

四庫全書

集部

欽定四庫全書

集部

施註蘇詩卷十二

詳校官庶吉士臣李傳熊

檢討臣何思鈞覆勘

覆校官中書臣宋 鎔

校對官主事臣龔敬身

謄錄監生臣沈希曾

欽定四庫全書

施註蘇詩卷十一

宋蘇軾撰

施元之原註

武進邵長蘅刪補

詩六十六首

起守高密至得代歸京師作
卷中有除夜大雪留澠州元日早晴遂行之

作

按公年譜除夜當是熙寧丙辰元日則丁巳

元日也

和文與可洋川園池三十首

唐地理志洋州洋川郡武德元年析

梁州之西鄉
黃金興勢置

湖橋

朱闌畫柱照湖明白葛烏紗曳履行橋下龜魚晚無數
識君拄杖過橋聲

橫湖

貪看翠蓋擁紅粧不覺湖邊一夜霜卷卻天機雲錦段

從教匹練寫秋光

古詩娥娥紅粉粧纖纖出素手采玉高唐賦蜺為旌翠
為蓋木玄虛海賦雲錦散文於沙汭之際韓退之曲江
荷花詩桴舟昆明度雲錦腳敲兩
舷呼吳歌謝玄暉詩澄江淨如練

書軒

雨昏石硯寒雲色風動牙籤亂葉聲庭下已生書帶草
使君疑是鄭康成

韓退之詩鄴侯家多書插架三萬軸一一懸牙籤新若
手未觸三齊記略鄭康成居不其城南山中教授山下
草如薤葉長尺餘
人號康成書帶草

冰池

不嫌冰雪遶池看誰似詩人巧耐寒記取羲之洗硯處
碧琉璃下黑蛟蟠

杜子美詩勝裏金花巧耐寒晉書王羲之傳嘗與人書云張芝臨池學書池水盡黑使人耽之若是未必後之也洗硯承天歸宗寺有右軍墨池

竹塢

晚節先生道轉孤歲寒唯有竹相娛麤才杜牧真堪笑
喚作軍中十萬夫

白樂天答賈舍人詩一別承明三領郡從教人道是麤
材北夢瑣言唐自大中以來以兵為戲廊廟之上耻言
黷畧就有如盧藩薛能者目為麤材杜牧之賦竹
林外裹兮十萬丈夫已見三卷次韻子由詩注

荻浦

雨折霜乾不耐秋
白花黃葉使人愁
月明小艇湖邊宿
便是江南鸚鵡洲

九域志鄂州古迹有鸚鵡洲庾信詩春洲鸚鵡
色流水桃花香李太白詩鸚鵡洲橫漢陽渡

蓼嶼

秋歸南浦蟬蛩鳴
霜落橫湖沙水清
卧雨幽花無限思

抱叢寒蝶不勝情

家語孔子謂宰我曰違山十里蟪蛄之聲猶在於耳江文通別賦送君南浦傷如之何

望雲樓

陰晴朝暮幾回新已向虛空付此身出本無心歸亦好
白雲還似望雲人

華嚴經處世界如虛空如蓮花不著水
陶淵明歸去來辭雲無心而出岫

天漢臺

漾水東流舊見經銀潢左界上通靈此臺試向天文覓

閣道中間第幾星

尚書蟠冢導漾東流為漢謝希逸月賦斜漢左界北陸
南躔漢天文志天一紫宮後十七星絕漢抵營室曰閣
道

待月臺

月與高人本有期
桂簷低戶映蛾眉
只從昨夜十分滿
漸覺冰輪出海遲

二樂榭

此間真趣豈容談
二樂并君已是三
仁智更煩訶妄見

坐令魯叟作瞿曇

公自注來詩云
二見因妄生

瀟泉亭

聞道池亭勝兩川
應須爛醉答雲煙
勸君多揀長腰米
消破亭中萬斛泉

杜子美詩爛醉是生涯
李賀憶昌谷山居詩長鎗江米熟
小樹棗花香

吏隱亭

吏隱出汝南先
賢傳鄭欽事

縱橫憂患滿人間
頗怪先生日日閑
昨夜清風眠北牖
朝來爽氣在西山

霜筠亭

鮮穠新篁不自持
嬋娟已有歲寒姿
要看凜凜霜前意
須待秋風粉落時

無言亭

殷勤稽首維摩詰
敢問如何是法門
彈指未終千偈了
向人還道本無言

露香亭

亭下佳人錦繡衣
滿身瓔珞綴明璣
晚香消歇無尋處

花已飄零露已晞

西域記西域國人首冠花縵身衣
纓珞詩小雅湛湛露斯匪陽不晞

涵虛亭

水軒花榭兩爭妍
秋月春風各自偏
惟有此亭無一物
坐觀萬景得成全

谿光亭

決去湖波尚有情
卻隨初日動簷楹
谿光自古無人畫
憑仗新詩與寫成

古詩話詩人以畫為
無聲詩詩為有聲畫

過谿亭

身輕步穩去忘歸四柱亭前野竹微
忽悟過谿還一笑
水禽驚落翠毛衣

爾雅畧約獨木橋也廬山記遠公與陶元亮陸修
靜談道不覺過虎溪因相與大笑故世傳三笑圖

披錦亭

煙紅露綠曉風香
燕舞鶯啼春日長
誰道使君貧且老
繡屏錦帳咽笙簧

禊亭

曲池流水細鱗鱗
高會傳觴似洛濱
紅粉翠娥應不要
畫船來往勝於人

何遜下方山詩鱗鱗水逆去瀾瀾急還舟晉東晉傳武帝問三日曲水之義哲曰昔周公城洛邑因流水以泛酒故逸詩云羽觴隨波又秦昭王以三日置酒河曲見金人奉水心之劍曰令君制有西夏乃霸諸侯因此立為曲水二漢相承皆為盛集

菡萏亭

日日移牀趁下風
清香不盡思何窮
若為化作龜千歲

巢向田田亂葉中

史記龜策傳有神龜在江南嘉林中常巢於芳蓮之上
抱朴子千歲龜巢於蓮葉或在叢蓍之下樂府江南曲
江南可採蓮
蓮葉何田田

茶蘼洞

長憶故山寒食夜野茶蘼發暗香來分無素手簪羅髻
且折霜蕤浸玉醅

長憶故山一作半雨半晴

篋簾谷異物志篋簾生水邊長數尺圍一尺五六寸一節相去六七寸廬陵界有

之始興以南尤多

漢川修竹賤如蓬斤斧何曾赦
籜龍料得清貧饒太守

渭川千畝在胷中

公有文與可畫篋當谷偃竹記云與可與其妻游谷中燒笋晚食發函得

此詩失笑噴飯滿案

盧仝寄舅詩竹林吾最惜新筍好看守萬籜抱龍兒攢迸溢林藪吾眼恨不見心腸痛如搗籜龍正稱冤莫殺入汝口丁寧囑付汝汝活籜龍否史記貨殖傳渭川千畝竹其人與千戶侯等

寒蘆港

溶溶晴港漾春暉蘆笋生時柳絮飛
還有江南風物否

桃花流水鱖

祖禮切魚肥

張志和漁父詞西塞山頭白鳥飛桃花流水鱖魚肥
永衡記黃河二月三月水名桃花水韻注鯀刀魚也

野人廬

少年辛苦事犁鋤剛厭青山遶故居老覺華堂無意味
卻須時到野人廬

此君菴

寄與菴前抱節君與君到處合相親寫真雖是文夫子
我亦真堂作記人

杜子美丹青引必逢佳士亦寫真王注名竹為抱節君
先生新語也與可畫竹名之曰墨君有堂焉先生作墨

君堂記

香橙徑

金橙縱復里人知不見鱸魚價自低
須是松江煙雨裏
小船燒薤擣香薤

王注鱸魚所以為鱠金橙所以為薤松江之鱸江南所稱也此為金薤玉薤又詳卷十和蔣夔寄茶詩注

南園

不種天桃與綠楊使君應欲候農桑
春畦一作疇雨過羅

紉膩夏壠風來餅餌香

北園

漢水巴山樂有餘，一麾從此首歸塗。
北園草木憑君詔，許我他年作主無。

顏延年五君詠屢薦不入官一麾乃出守
杜牧之將赴吳興詩擬把一麾江海去

寄題刁景純藏春塢

白首歸來種萬松，待看千尺舞霜風。
年拋造物陶甄外，春在先生杖履中。
楊柳長齊低戶暗，櫻桃爛熟滴階紅。
何時卻與徐元直，共訪襄陽龐德公。

景純藏春塢前有岡皆種松公有詩云為君栽挿萬松岡白樂天夢游春詩門柳暗全低簷櫻紅半熟襄陽記龐德公居峴山之南未嘗入城府諸葛孔明每至德公家獨拜牀下德公初不令止司馬德操嘗詣德公值其上冢德操徑入其室呼德公妻子使速作黍徐元直向云當來就我與德公談其妻子皆羅拜堂下奔走共設須臾德公還直入相就不知何者是客也

玉盤盂 并序

東武舊俗每歲四月大會于南禪資福兩寺以芍藥供佛而今歲最盛凡七千餘朵皆重跗累萼繁麗豐碩中有白花正圓如覆盂其下十餘葉稍大

承之如槃姿格絕異獨出於七千朵之上云得之
於城北蘇氏園中周宰相莒公之別業也而其名
俚甚乃為易之

雜花狼籍占春餘芍藥開時掃地無兩寺粧成寶瓔珞
一枝爭省玉盤盂佳名會作新翻曲絕品難尋舊畫圖
從此定知年穀熟姑山親見雪肌膚

莊子逍遙游藐姑射之山神人居焉肌膚若冰雪綽約若處子其神凝使物不疵癘而年穀熟

花不能言意可知令君痛飲更無疑但持白酒勸嘉客

直待瓊舟覆玉彝
負郭相君初擇地
看羊屬國首吟詩
吾家豈與花相厚
更問殘芳有幾枝

周禮六彝皆有舟六彝謂鷄彝鳥彝犀彝黃彝虎彝雖
彝注舟所以薦彝如今之承盤也負郭看羊俱用蘇氏
事

和潞公超然臺

我公厭富貴常苦勲業尋相期
赤松子永望白雲岑清
風出談笑萬竅為號吟吟成超然詩
洗我蓬之心嗟我
本何人麋鹿強冠襟
身微空志大交淺屢言深
囑公如

得謝呼我幸寄音但恐酒錢盡煩公揮橐金

漢張良傳注赤松子仙人號神農時為雨師事見劉向列仙傳詩大雅穆如清風再見莊子齊物論作則萬竅怒號逍遙游夫子猶有蓬之心也夫張景陽詠史揮金樂當年歲暮不留儲杜子美戲簡鄭廣文賴有蘇司業時時與酒錢漢書陸賈傳出所使越橐中裝賣千金分其子

聞喬太博換左藏知欽州以詩招飲

今年果起故將軍幽夢清詩信有神馬革裹屍真細事
虎頭食肉更何人陣雲冷壓黃茅瘴羽扇斜揮白葛巾
痛飲從今有幾日西軒月色夜來新

公先有鐵溝行贈喬云今年定起故將軍故此云果且
曰信有神也杜子美詩醉裏從為客詩成覺有神後漢
馬援傳男兒要當死於邊野以馬革裹屍還葬耳何能
卧牀上在兒女子手中邪班超傳相者曰生燕頤虎頭
飛而食肉此萬里侯相也史記天官書陣雲如立垣再
見通真子瘴論嶺南從仲春訖仲夏行青草瘴季夏訖
孟冬行黃茅瘴蜀諸葛亮與司馬宣王對於渭濱王
戎服蒞事使人視亮乘素車葛巾羽扇指揮三軍

喬將行烹鵝鹿出刀劍以飲客以詩戲之

破匣哀鳴出素蚪倦看鷓鴣聽啾啾明朝只恐兼烹鶴
此去還須卻佩牛便可先呼報恩子不妨仍帶醉鄉侯
他年萬騎歸應好奈有移文在故邱

雲谿友議韋鵬翼題盱眙邵明府壁云自從煮鶴燒琴
後背卻青山卧明月佩牛用漢龔遂事注見前韓退之
送石處士詩忽騎將軍馬自號報恩子唐王績撰醉鄉
記以配劉伶酒德頌皮日休詩他年謁帝言何事請贈
劉伶作醉侯孔稚珪北山移文引云周彦倫先隱北山
後出為海鹽令欲還山稚珪乃假山靈之意作文移之

次韻劉貢父李公擇見寄二首

白髮相望兩故人眼看時事幾番新曲無和者應思郢

論少卑之且借秦歲惡詩人無好語

公自注公擇來詩皆道吳中饑苦之

事夜長鰥守向誰親

公自注貢父近喪妻

少思多睡無如我鼻息

雷鳴撼四鄰

宋玉對楚王問客有歌於郢中者云云其曲彌高其和彌寡漢張釋之傳釋之言便宜事文帝曰卑之母甚高論令今可行於是言秦漢間事漢賈山傳言治亂之道借秦為喻名曰至言李賀詩沙路歸來聞好語旱火不下雨

何人勸我此間來絃管生衣甑有埃綠蟻濡脣無百斛蝗蟲撲面已三回磨刀入谷追窮寇灑涕循城拾棄孩為郡鮮歡君莫歎猶勝塵土走章臺

甑埃用後漢范丹甑中生塵事已見七卷注謝玄暉詩嘉魴所可薦綠蟻方獨持史記秦始皇後贊餐未及下咽酒未及濡唇漢張敞傳敞守京兆尹稱職然無威儀時罷會過走馬章臺街公烏臺詩話時朝廷新法減削

公使錢及造酒不得百石致管絃生衣甌釜生埃及言蝗蟲災傷盜賊四起旱澇饑饉以見政事闕失皆新法之不便故

寄黎眉州

黎眉州名錞字希聲蜀人志林云希聲治春秋有家法然為人質木遲緩

劉貢父戲為黎樣子黎以為指其德不知樣子真是木也一日聯騎出市人有鬻之者大笑幾落馬今吾謫海南所居有此木霜實纍然二君皆入鬼錄坐念故友之風味豈可復得劉固不泯於世黎亦能文字不苟隨者

膠西高處望西川應在孤雲落照邊瓦屋寒堆春後雪峨眉翠掃雨餘天治經方笑春秋學好士今無六一賢

公自注君以春秋受知歐陽文忠公公自號六一居士

且待淵明賦歸去共將詩

酒趁流年

韓退之寄盧仝詩春秋三傳束高閣獨抱遺經究終始按王介甫素不喜春秋目為斷爛朝報時介甫方得志故云治經方笑春秋學公為眉人黎方守眉故有淵明歸去之句

和趙郎中捕蝗見寄

趙郎中成伯時以尚書郎倅密州

麥穗人許長穀苗牛可沒天公獨何意忍使蝗蟲發驅攘著令典農事安可忽我僕既胼胝我馬亦款矻飛騰漸云少筋力亦已竭苟無百篇詩何以醒睡兀初如疏

眈澹漸若決澌渤往來供十吏腕脫不容歇平生輕妄庸熟視笑魏勃愛君有逸氣詩壇專斬伐民病何時休吏職不可越慎無及世事向空書咄咄

韓退之稻畦詩魚肥知已秀鶴沒覺初深尚書澹眈澹距川漢遊俠傳陳遵為河南太守至官召書吏十人治私書謝京師故人遵馮几口占書數百封唐王勳傳為鳳閣舍人壽春等五王出閣有司具儀忘載冊文羣臣已在方悟其闕勳召五吏執筆分占其辭粲然唐蘇頲傳為中書舍人時書詔填委口所占授輕重無所差書吏白曰丐公徐之不然手腕脫矣漢高五王傳灌嬰聞魏勃奉教齊王反使使召責問勃勃退立股戰而栗恐不能言者灌將軍熟視笑曰人謂魏勃勇妄庸人耳漢宣帝紀吏或越職踰法以取名譽晉殷浩傳雖被放黜

口無怨言但終日書
空作咄咄怪事四字

登常山絕頂廣麗亭

西望穆陵關東望琅邪臺南望九仙山北望空飛埃相
將叫虞舜遂欲歸蓬萊嗟我二三子狂飲亦荒哉紅裙
欲仙去長笛有餘哀清歌入雲霄妙舞纖腰回自從有
此山白石封蒼苔何嘗有此樂將去復徘徊人生如朝
露白髮日夜催弃置當何言萬劫終飛灰

史記齊世家昔召康公命我先君曰東至海西至河南
至穆陵北至無棣王注穆陵山在沂水縣琅琊山在沂

水胸山諸城三縣界始皇嘗登山樂之作琅琊臺地在
今諸城東南又九仙山在錢塘臨安或云在密州諸城
縣杜子美慈恩塔詩回首叫虞舜蒼梧雲正愁盧仝詩
蓬萊山在何處玉川子乘此清風欲歸去趙飛燕外傳
帝嘗與后坐瀛洲樹后歌歸風送遠之曲帝以文犀筋
擊玉甌令后所愛侍郎馬無方吹笙以倚后歌中流歌
酣風大起后揚袖曰仙乎仙乎去故而就新順風揚音
無方長喻細擗與相屬帝曰無方為我持后遽捨笙持
后履久之風霽后泣曰帝恩我使我仙去不得悵然泣
數行下他日宮姝或襞帋為綉號留仙帋又飛燕舞腰
宛轉若流風之回雪晉羊祜傳登岘山顧謂鄒湛等曰
自有宇宙便有此山由來賢達勝士登此遠望如我與
卿者多矣然埋滅無聞使人悲傷如百歲後有知魂
魄猶應登此山也刻灰見七卷金門寺中絕句詩注

薄薄酒二首 并序

膠西先生趙明叔家貧好飲不擇酒而醉常云薄
薄酒勝茶湯醜醜婦勝空房其言雖俚而近乎達
故推而廣之以補東州之樂府既又以為未也復
自和一篇聊以發覽者之一噓云耳

薄薄酒勝茶湯麤麤布勝無裳醜妻惡妾勝空房五更
待漏華滿霜不如三伏日高睡足北牕涼珠襦玉柙萬
人相送歸北邙不如懸鵲百結獨坐負朝陽生前富貴
死後文章百年瞬息萬世忙夷齊盜蹠俱亡羊不如眼

前一醉是非憂樂兩都忘

西京雜記漢制諸陵皆珠襦玉匣形如鎧甲以金縷之
張景陽七哀詩北邙何累累高陵有四五借問誰家墳
皆云漢世主王注子夏衣若懸鶉董京衣百結宋國有
田夫嘗衣縕賡自曝於日顧其妻曰負日之暄人莫知
將獻之於吾君莊子駢拇篇臧與穀二人牧羊而俱亡
其羊問臧則挾策讀書問穀則博塞以遊二人事業不
同其於亡羊均也伯夷死名於首陽之下盜跖死利
於東陵之上二人所死不同其於殘生傷性均也

薄薄酒飲兩鍾麤麤布著兩重美惡雖異醉暖同醜妻
惡妾壽乃公隱居求志義之從本不計較東華塵土北
牕風百年雖長要有終富死未必輸生窮但恐珠玉留

君容千載不朽遭樊崇文章自足欺盲聾誰使一朝富
貴面發紅達人自達酒何功世間是非憂樂本來空

應璩古樂府道上逢三叟何以得此壽中叟前致詞室
內妻妾醜漢高祖紀幾敗乃公事東華塵前輩戲語有
西湖風月不如東華軟紅香土北牕風見前註漢王莽
傳赤眉樊崇等入關燒長安官室為墟宗廟園陵皆發
掘唯霸陵杜陵完文帝霸陵宣帝杜陵後漢劉盆子傳
赤眉發掘諸陵凡有玉押飲者率皆如生故遂多行淫
穢古樂府今日牛羊上邱隴當時
近前面發紅白樂天當作酒功贊

同年王中甫挽詞

王中甫名介三衢人中嘉祐
六年直言極諫拜東坡入三

等中甫四等為秘書丞知靜海縣除秘閣校
勘熙寧初介甫被召不復辭中甫寄詩曰草

廬三顧動幽蟄蕙帳一空生曉寒盖有所諷
介甫後賦詩云丈夫出處非無意猿鶴從來
自不知為中甫發也介甫既得政神宗轉對
羣臣中甫進疏云願陛下師心勿師人帝納
之以喻介甫且以奏疏示之介甫不樂深闢
其言會考開封試與劉貢父言語往復御史
劾之罷判鼓院歸館知湖州去郡卒官止祠部郎中

先帝親收十五人

公自注仁宗朝賢良十五人今惟富鄭公張宣徽錢純老及余與舍弟在

耳四方爭看擊鵬鷃如君事業真堪用顧我衰遲不足

論出處陞沉十年後死生契濶幾人存他時京口尋遺

迹宿草猶應有淚痕

詩國風死生契濶與子成說杜子
美詩他時一笑後今日幾人存

七月五日二首

法令所載尋醫為去官入務乃住理詩中所用蓋出此

避謗詩尋醫畏病酒入務蕭條北牕下長日誰與度今
年苦炎熱草木困薰煮況我早衰人幽居氣如縷秋來
有佳興林稻已含露還復此微吟往和糟牀注

唐陸贄傳避謗不著書晉顧榮傳謂張翰曰惟酒可以忘憂但無如作病何王注詩尋醫謂不作詩也酒入務謂止酒不飲也杜子美詩流汗卧江亭更深氣如縷又羌村詩預知林稻收已覺糟牀注

何處覓新秋蕭然北臺上秋來未云幾風日已清亮雲

間聳孤翠林表浮遠漲新棗漸堪剥晚瓜猶可餉西風
送落日萬竅含悽愴念當急行樂白髮不汝放

詩國風八月剝棗萬竅注三見漢楊惲傳人生行
樂耳須富貴何時杜子美詩苦遭白髮不相放

趙郎中見和戲復答之

趙子吟詩如潑水一揮三百八十字奈何效我欲尋醫
恰似西施藏白地趙子飲酒如淋灰一年十萬八千盃
若不令君早入務飲竭東海生黃埃我哀臨政多繆錯
羨君精采如秋鶚頗哀老子今日飲為君坐嘯主畫諾

韓退之寄崔立之詩文如翻水成初不用意為白樂天
簡簡吟十三行坐事調品不肖迷頭白地藏李太白襄
陽歌云百年三萬六千日一日須傾三百盃若以歲計
則當十萬八千杯矣神仙傳麻姑云海中行復揚塵鮑
照蕪城賦直視千里外唯見起黃埃北夢瑣言符載為
劉闢真贊云靈螭出水秋鷄乘風後漢馬援傳援為隴
西太守任吏以職但總大體而已諸曹吏白外事輒曰
此丞掾之任何足相煩頗哀老子使得遨遊若大姓侵
小民黥羌欲拒旅此太守事耳前漢袁盎傳絲能日飲
亡何詳四卷和劉道原詠史詩注後漢黨錮傳汝南太
守竇資任功曹范滂南陽太守成瑨亦委功曹岑暉二
郡為謠曰汝南太守范孟博南陽竇資主畫諾南陽太
守岑公孝弘農
成瑨但坐嘯

次韻周邠寄鴈蕩山圖二首

周邠字開祖錢塘人東坡倅抗三年

與閒祖數從湖山之游見於酬唱故云西湖
三載與君同是時閒祖為樂清令鴈蕩山寔
內在境

指點先憑採藥翁丹青化出大槐宮眼明小閣浮煙翠
齒冷新詩嚼雪風二華行觀雄陝右九仙今已壓京東
公自注將赴河中密邇太華九
仙在東武奇秀不減鴈蕩也 此生的有尋山分已覺
溫台落手中

山志鴈蕩山在溫州樂清縣天下奇秀然自古圖牒不
記祥符中方有人見之按西域書阿羅漢諾詎羅居震
旦東南際大海鴈蕩山芙蓉龍湫唐貫休為諾詎羅贊
有鴈蕩經行雲漠漠龍湫宴坐雨濛濛句此山南有笑

蓉峰下有芙蓉驛前臨大海未知鴈蕩龍湫所在後因
伐木見山頂有大池相傳以為鴈蕩下有二潭以為龍
湫云經行峽宴坐峰則後人因貫休詩名之者後漢龐
公常入鹿門山采藥不返異聞集淳于棼醉夢二紫衣
吏召棼曰大槐安國王致命以為南柯太守及覺尋其
所經由乃宅南大槐下蟻穴耳張平子西京賦綴以二
華註大華少華也杜子美將適吳
楚詩不意青草湖扁舟落吾手

西湖三載與君同馬入塵埃鶴入籠東海獨來者出日
石橋先去踏長虹遙知別後添華髮時向樽前說病翁
所恨蜀山君未見他年攜手醉郛筒

齊地記秦始皇作石橋欲過海者日出處有神能驅石
下海石去不速神輒鞭之石皆流血山志天台山石橋

廣不盈尺長數十丈下臨絕澗渡得平路上有瓊樓玉
闕碧林醴泉瑤草神奇莫可名狀舊稱金庭洞天華陽
風俗錄郭人劉竹為筒釀酒筒中閉以藕絲包以蕉葉
信宿香達於外然後斷之俗號郭筒酒成都記郭縣因
水得名杜子美詩
酒憶郭筒不用沽

送碧香酒與趙明叔教授

趙明叔教授膠西人

聞君有婦賢且廉勸君慎勿為楚相不羨紫駝分御食
自遣赤腳沽村釀嗟君老狂不知愧更吟醜婦惡嘲謗
諸生聞語定失笑冬暖號寒卧無帳碧香近出帝子家
鵝兒破殼酥流盎不學劉伶獨自飲一壺往助齊眉餉

史記滑稽傳優孟為叔教衣冠抵掌談語歲餘像孫叔
教莊王置酒優孟前為壽王大驚欲以為相優孟曰請
歸與婦計之三日後復來曰婦言慎無為楚相不足為
也如孫叔教盡忠為慮以治楚今死其子無立錐之地
必如叔教不如自殺於是莊王謝優孟召叔教子封之
寢邱又互見十卷寄呂穆仲詩注杜子美麗人行紫駝
之峰出翠釜又御厨絲絡送八珍韓退之寄盧仝詩一
奴長鬚不裹頭一婢赤腳老無齒又進學解冬暖而兒
號寒年豐而妻號饑碧香都尉王詵家釀也楚辭屈原
九歌帝子降兮北渚註帝子謂堯女娥皇女英也鵝兒
用杜子美詩已見前注晉劉伶傳伶求酒於妻妻涕泣
諫曰君酒太過必宜斷之伶曰善吾不能自禁惟當祝
鬼神自誓便可具酒肉妻從之伶跪祝曰天生劉伶以
酒為名一飲一斛五斗解醒婦兒之言慎勿可聽仍引
酒御肉塊然復醉又見十卷小兒詩注後漢梁鴻
傳其妻孟光為具食不敢於鴻前仰視舉案齊眉

趙既見和復次韻答之

長安小吏天所放日夜歌呼和丞相豈知後世有阿瞞

公自注曹公自言參之後

北海樽前捉私釀先生未出禁酒國詩語

孤高常近謗幾回無酒欲沽君卻畏有司書簿帳

公自注近

制公使酒過數法甚重

酸寒可笑分一斗日飲亡何足袁盎更將

險語壓袁翁只恐自是臺無餉

莊子馬蹏篇一而不黨命曰天放漢曹參相舍歌呼已見四卷再和詩注後漢孔融傳曹操以年饑兵興表制酒禁融頻書爭之多侮慢之辭融嘗為北海相阿瞞操小字唐王績傳待詔門下省故事官給酒日三升或問

待詔何樂谷曰良醞可戀耳侍中陳叔達聞之日給一斗時稱斗酒學士漢袁盎注再見

趙郎中往莒縣逾月而歸復以一壺遺之仍用

前韻

東鄰主人游不歸悲歌夜夜聞春相門前人鬧馬嘶急
一家喜氣如春釀王事何曾怨獨賢室人豈忍交譴謗
大兒踉蹌越門限小兒呶啞語繡帳定教舞袖掣伊涼
更想夜庖鳴甕盎題詩送酒君勿謂免使退之嘲一餉
曲禮春不相史記商君傳童子不歌謠春者不相杵詩
小雅我從事獨賢又國風我入自外室人交徧譴我韓

退之贈張籍詩有兒雖甚憐教示不免簡君來好呼出
踉蹌越門限漢東方朔傳伊優啞者辭未定也韓退之
醉贈張祕書詩長安衆富兒盤饌羅羶葷不解
文字飲惟能醉紅氍雖得一餉樂有如聚飛蚊

蘇潛聖挽詞

蘇潛聖名泳成都新繁人舉進士知乾州邛州官至職方郎中致仕

其子名槃亦登第終著作郎

妙齡馳譽百夫雄晚節忘懷大隱中
悃悃無華真漢吏文章爾雅稱吾宗
趨時自負平生志有子還應不死同
惟我閑思十年事數行老淚寄西風

後漢章帝紀元和二年詔曰安靜之吏悃悃無華杜子美詩出門搔白首苦負平生志左傳昭六年季平子曰

子服氏有子哉三國吳張溫傳孫權問公卿曰溫當今與誰為比顧雍曰當今無輩權曰如是張允不死也

和鼂同年九日見寄

仰看鸞鵠刺天飛富貴功名老不思病馬已無千里志
騷人長負一秋悲古來重九皆如此別後西湖付與誰
遣子窮愁天有意吳中山水要清詩

韓退之祭柳子厚文一斤不復羣飛刺天晉王敦傳每
酒後輒詠魏武樂府曰老驥伏櫪志在千里烈士暮年
壯心不已楚辭宋玉九辨悲哉秋之為氣也又皇天平
分四時兮竊獨悲此凜秋杜牧之九日詩古往今來只
如此牛山何必獨沾衣白樂天讀李
杜集詩天意君須會人間要好詩

送喬施州

王注喬叙字禹功嘗以太博換左藏知欽州其後除知施州

恨無負郭田二頃空有載行書五車江上青山橫絕壁

雲間細路躡飛虵鷄號黑暗通蜜貨蜂鬧黃連採蜜花

共怪河南門下客不應萬里向長沙

公自注喬受知於吳丞相而施州風

土大類長沙

負郭田注再見前莊子惠施多方其書五車酉陽雜俎波斯人謂牙為白暗犀為黑暗抱朴子通天犀有一白理如線者以盛米置羣雞中雞往啄至輒驚卻故南人名曰駭雞犀也本草南中有蜜色黃味苦蜂銜黃連花之作

雪夜獨宿栢仙菴

晚雨纖纖變玉霏，小菴高卧有餘清。
夢驚忽有穿牕片，夜靜惟聞瀉竹聲。
稍壓久溫聊得健，未濡秋旱若為耕。

天公用意真難會，又作春風爛漫

一作晴

韓退之詩：廉纖晚雨不能晴。韓詩外傳：雪花曰霏。謝惠連雪賦：始綠薨而昌棟，終開簾而入隙。杜荀鶴雪詩：巖谷惟聞折竹聲。李太白答丁十一詩：待得明朝酒醒罷，與君爛漫尋春暉。

和孔郎中荆林馬上見寄

孔宗翰字周翰，宣聖五十世孫，與東坡密。

州為代未至，以此詩先之。

秋禾不滿眼宿麥種亦稀永媿此邦人芒刺在膚肌平
生五千卷一字不救饑方將怨無襦忽復歌緇衣堂堂
孔北海直氣凜羣兒朱輪未及郊清風已先馳何以累
君子十萬貧與羸滔滔滿四方我行竟安之何時劍關
路春山聞子規

漢書食貨志董仲舒曰願詔大司農使關中益種宿麥
霍光傳若有芒刺在背北史崔儵傳大署其戶曰不讀
五千卷書者無得入此室三國遺錄魏文帝云文為當
代所宗讀書五千卷許登閣觀書登者才六人後漢廉
范傳為蜀郡太守百姓歌之曰平生無襦今五絢詩小
序緇衣美武公也後漢孔融傳融字文舉為北海相韓

退之詩不知羣兒愚那用故謗傷後漢輿服志中二千石二千石皆皂蓋朱兩轡其千石六百石朱左轡九域志劍門關隸利州路

留別雲泉

公雲泉記常山西南有泉乃琢石為井作亭其上而名之曰雲泉古者謂

吁嗟而求雨曰雲

舉酒屬雲泉白髮日夜新何時泉中天復照泉上人二年飲泉水魚鳥亦相親還將弄泉手遮日向西秦

世說晉簡文入華林園顧謂左右曰會心處不必在遠翳然林水便自有濠濮間想也覺鳥獸禽魚自來親人杜牧之途中絕句惆悵江湖釣竿手卻遮西日向長安

留別釋迦院牡丹呈趙倅

春風小院卻

一作初

來時壁閒惟見使君詩應問使君何

處去憑花說與春風知年年歲歲何窮已花似今年人
老矣去年崔護若重來前度劉郎在千里

本事詩博陵崔護清明日游都城南從居人家求飲扣門久之有女子以杯水至獨倚小桃佇立意屬殊厚明年復往門巷如故而扁鑰寂然因題詩左扉曰人面不知何處去桃花依舊笑春風劉郎用劉禹錫句注再見

董儲郎中嘗知眉州與先人游過安邱訪其故

居見其子希甫留詩屋壁

白髮郎潛舊使君至今人道最能文隻雞敢忘橋公語
下馬來尋董相墳久月負薪雖一作那得免鄰人吹笛不
堪聞死生契濶君休問灑淚西南向白雲

漢武帝至郎署見一郎眉鬚皓白問何時為郎對曰臣
姓顏名駟以文帝時為郎文帝好文而臣好武景帝好
老臣尚少陛下好少臣已老是以三葉不遇上感其言
擢為會稽都尉尉張衡賦龐眉而郎潛兮逮三葉而遭武
後漢橋玄傳魏武祭橋文云士死知已懷此無忘又承
從容約誓之言祖歿之後路有經由不以斗酒隻雞過
相沃酹車過三步腹痛勿忍按三國魏太祖紀祖歿作
殂逝勿怨作勿怪國史補董仲舒墳在長安門人過必
下馬故號下馬陵而語訛謂蝦蟇陵史記滑稽傳孫叔
敖死其子窮困負薪向子期思舊賦序余少與嵇康呂

安居止接近其後各以事見法逝將西邁經其舊廬于
時日薄虞淵寒冰淒然鄰人有吹笛者發聲寥亮追思
曩昔游燕之好感昔而歎故作賦云杜
子美懷舊詩老罷知明鏡悲來望白雲

劉貢父見余歌詞數首以詩見戲聊次其韻

十載飄

一作漂

然未可期那堪重作看花詩門前惡語誰

傳去醉後狂歌自不知刺舌君今猶未戒炙眉吾亦更
何辭相從痛飲無餘事正是春容最好時

杜牧之詩十載飄然繩檢外隋書賀若弼父敦臨刑呼
弼謂曰吾以舌死汝不可不思因引錐刺弼舌戒以謹
口晉郭舒為王澄別駕荆土士人宗廩嘗因酒忤澄怒
叱左右棒廩舒厲色謂左右曰使君過醉汝輩何敢妄

動澄憲曰別駕狂邪因遣搯其鼻炙其眉舒跪而受之
厥遂得免杜子美醉時歌忘形到爾汝痛飲真吾師

除夜大雪留維州元日早晴遂行中途雪復作

除夜雪相留元日晴相送東風吹宿酒瘦馬兀殘夢
曉光開旋轉餘花弄下馬成野酌佳哉誰與共須臾
晚雲合亂灑無缺空鵝毛垂馬駿自怪騎白鳳三年東
方早逃戶連歌棟老農釋耒歎淚入饑腸痛春雪雖云
晚春麥猶可種敢怨行役勞助爾歌飯甕

劉駕早行詩馬上兀殘夢馬嘶時復驚白樂天詩門前
雪片似鵝毛曹唐游仙詩不知今夜游何處侍從皆騎

白鳳凰農諺霜松打
霧松窮漢備飯甕

大雪青州道上有懷東武園亭寄孔周翰

超然臺上雪城郭山川兩奇絕海風吹碎碧琉璃時見
三山白銀闕蓋公堂前雪綠牕朱戶相明滅堂中美人
雪爭妍粲然一笑玉齒頰就中山堂雪更奇青松怪石
亂瓊絲惟有使君游不歸五更上馬愁斂眉君不見淮
西李侍中夜入蔡州縛取吳元濟又不見襄陽孟浩然
長安道上騎驢吟雪詩何當閉門一作戶飲美酒無人毀

譽河東守

杜子美詩天地黯慘忽異色波濤萬頃堆琉璃史記封
禪書三神山其物禽獸盡白金銀為宮闕唐李愬討吳
元濟會大雪夜入蔡城黎明禽元濟檻送京師王注或
問鄭縈詩思對曰詩思在灞橋雪中驢背上又浩然有
長安道中雪詩史記季布為河東守孝文時人有言其
賢召欲以為御史大夫夫人又言其勇使酒難近至留邸
一月見罷布進曰陛下以一人譽召臣以一
人毀去臣臣恐天下有識者有以窺陛下也

至濟南李公擇以詩相迎次其韻二首

公擇知
湖州東

坡以杭倅來會今自高密官滿
過濟南而公擇復為守在焉

弊裘羸馬古河濱野濶天低糝玉塵自笑餐氈曲屬國

來看換酒謫仙人
宦游到處身如寄
農事何時手自親
刺作新詩與君和
莫因風雨廢鳴晨

何遜詠雪詩時逐微風起
誰言非玉塵餐氎漢蘇武事
武還至京師拜典屬國注已見前
摭言賀知章一見李白呼為謫仙人
因解金龜換酒為樂詩國風風雨如晦
鷄鳴不已杜子美崔樹鷄欄詩不昧風雨晨
亂離減憂感

夜擁笙歌雪水濱
回頭樂事總成塵
今年送汝作太守
到處逢君是主人
聚散細思都是夢
身名漸覺兩非親
相從繼燭何須問
蝙蝠飛時日正晨

送人作守羅友事見三卷送呂希道詩注老子名與身孰親左傳莊二十二年飲齊桓公酒樂公曰以火繼之
蝙蝠注已見七卷

和孔君亮郎中見贈

偶對先生盡一樽醉看萬物洶崩奔優游共我聊卒歲
骭髀如君合倚門只恐掉頭難久住應須傾蓋便深論
固知嚴勝風流在又見長身十世孫
公自注戲字君嚴弟戲字君勝退之

志其墓云孔世卅八吾見其孫
白而長身今君亮四十八世矣

謝靈運入彭蠡詩圻岸屢崩奔史記孔子世家優哉游哉維以卒歲
骭髀倚門用趙壹句詳見七卷明日重九

詩注

施註蘇詩卷十一

欽定四庫全書

施註蘇詩卷十二

宋 蘇軾 撰

施元之原註

武進邵長蘅刪補

詩四十首

起丁巳春留京師至四月之官彭城以後作

送范景仁游洛中

小人真闇事閒退豈公難道大吾何病言深聽者寒憂
時雖蚤白住世有還丹得酒相逢樂無心所遇安去年
行萬里蜀路走千盤投老身彌健登山意未闌西游爲
櫻筍東道盡鵲鸞杖屨攜兒去園亭借客看折花斑竹
寺弄水石樓灘驚馬哀憐白驚雷怯笑韓薛書標洞府
公自注歐陽永叔嘗游嵩山日暮於絕壁上見苔蘚成文云神清之洞明日復尋不見松蓋偃天
壇試與劉夫子重尋靖長官公自注劉几云曾見人嵩山幽絕處眼光如猫意其
爲靖長官也又送喬全詩引云
靖長官唐末五代人得道不死

史記孔子世家顏回曰夫子之道至大故天下莫能容
雖然夫子推而行之不容何病不容然後見君子戰國
策馮忌見趙王曰服子曰客交淺而言深是亂也客曰
不然交淺而言深是忠也按景仁嘗累疏力詆王安石
安石大怒持其疏至手顫故云聽者寒隱丹經有大小
還丹秦中歲時記唐有櫻筍厨白樂天歌馬吟忽憶家
園須速去櫻桃欲熟筍應生左傳僖三十年舍鄭以為
東道主世說陳太邱詣荀朗陵貧儉無僕役乃使元方
將車季方持杖從後唐白居易致仕洛中既老又病風
將鬻其駱馬馬悲鳴復留之作不能忘情吟又有賣駱
馬詩嵩山韓退之題名云元和四年二月二十六日與
樊宗師盧仝自洛中至少室謁李勃遂至龍潭下釣遇
雷明日乃歸歐陽集古跋尾右韓退之題名在洛陽嵩
山天封宮石柱上刻之記龍潭遇雷事余為西京留守
推官游嵩山入天封宮登山頂之武后封禪處有石記
戒人游龍潭者毋語笑以黷神龍龍怒則有雷恐因念

退之記遇雷意其有所誠也
九域志洛陽有天壇山

次韻景仁留別

公老我亦衰相見恨不數臨行一杯酒此意重山嶽
歌詞白紵清琴弄黃鐘濁詩新眇難和飲少僅可學
欲參兵部選有力誰如犖且作東諸侯山城雄鼓角
南游許過我不憚千里邈會當聞公來倒屣髮一作
三握

稽叔夜養生論從哀得白從白得老沈約別范安成詩
及爾各哀暮非復別離時勿言一杯酒明日難重持樂

府題解白紵吳地所出白紵舞本吳舞也梁武帝令沈約改其詞為四時歌周禮凡樂黃鐘為宮鄭氏云凡五聲宮之所生濁者為多唐選舉志武選兵部主之朝野僉載崔湜為吏部侍郎有選人白湜曰某能翹關負米湜笑曰若壯何不選兵部答曰外議謂侍郎下有氣力者即得選左傳莊三十二年雩講於梁氏女公子觀之圍人犖自牆外與之戲子般怒使鞭之公曰不如殺之是不可鞭犖有力焉能投蓋於稷門晉嵇康傳呂安服康高致每一相思千里命駕三國王粲傳蔡邕聞琴在門倒屣迎之史記魯世家周公一沐三握髮一飯三吐哺

書韓幹牧馬圖

南山之下汧渭之間想見開元天寶年八坊分屯隘秦

史記秦始皇紀非子好馬周孝王召使主馬於汧渭之
間唐兵志唐初得突厥馬二千匹又得隋馬三千於赤
岸澤徙之隴右監牧之制始於此用張萬歲領羣牧自
貞觀麟德四十年間馬七十六萬六千置八坊歧幽涇
寧間地廣千里自萬歲失職馬政頗廢開元初國馬益
耗及王毛仲領內外閑廐馬稍稍復始二十四萬至十
三年及四十三萬王毛仲傳從帝東封牧馬數萬疋每
色一隊相間如錦繡天子才之杜子美天育驃騎歌當
時四十萬匹馬張公歎其才盡下詩駟頌有騅有駟又
駟駟驪魚駢皇俱見駟頌驪驪見爾雅赤兔呂布馬名
唐韻駟駟番大馬劉琬馬賦龍頭烏目麟腹虎胷杜胡
馬行鳳臆麟鬐未易識周禮校人掌王馬之政天子十
有二閑馬六種六典曰隋文帝服拓黃袍巾帶聽朝遂
以為常莊子田子方篇宋元君將畫圖衆史皆至紙筆
和墨在外者半杜子美丹青引贈曹將軍弟子韓幹早
入室亦能畫馬窮殊相幹惟畫肉不畫骨忍使驂駟氣

凋喪漢東方朔傳結股腳連腫尻莊子馬蹄篇伯樂曰
我善治馬燒之剔之刻之雜之連之以羈韁編之以早
棧馬之死者十二三矣曹植賦翩若驚鴻宛若游龍史
記田單傳後如脫兎敵不及拒天文志漢中四星曰天
駟旁一星曰王良王良策馬車騎滿野漢王褒傳及至
駕鬻鄒膠乘旦王良執靶韓哀附輿縱馳騁驚忽如景
靡過都趙國蹶如歷塊追奔電逐
遺風漢灌夫傳局促効轅下駒

送魯元翰少卿知衛州

公自密移守河中至京
師改徐州時有旨不許

入國門寓城外范蜀公園故首句云云魯元
翰名有開乃肅簡公之姪自知南康代還王
介甫問江南如何元翰對新法當為異日患
介甫怒僅得倅杭公時亦為抗倅與魯同官
魯先代去七卷有壽星寺
餞魯少卿詩即元翰也

冗士無處著寄身范公園桃花忽成陰薺麥秀已繁閉
門春晝永惟有黃蜂喧誰人肯攜酒共醉榆柳村髯卿
獨何者一月三到門我不往拜之髯來意彌敦堂堂元
老後疊疊仁人言憶在錢塘歲情好均弟昆時於冰雪
中笑語作春溫欲飲徑相覓夜開叢竹軒搜尋到篋笥
鮓醢無復存每愧煙火中玉腕親炮燂別來今幾何相
對如夢魂告我當北渡新詩侑清樽坡陀太行麓洶湧
黃河翻仕宦非不遇王畿西北垣斯民如魚耳見網則

驚奔皎皎千文清不如尺水渾刑政雖首務念當養其
源一聞襦袴音盜賊安足論

蜀關羽傳猶未若髯之絕倫逸羣也晉謝安傳弱冠詣
王濛濛曰此客亹亹為來逼人左傳昭三年君子曰仁
人之言其利溥哉杜子美貽柳少府詩柳侯披衣笑見
我顏色溫又醉時歌得錢即相覓沽酒不復疑小說載
詩云吹火紅唇動煊薪玉腕斜遙觀煙裏面恰似霧中
花事見孟啓本事詩襦袴用後漢廉范事見前卷和孔
郎中詩注

次韻子由送蔣夔赴代州學官

功力爭先變法初典刑獨守老成餘窮人未信詩能爾

倚市懸知繡不如代北諸生漸狂簡牀頭雜說為爬梳
歸來問鴈吾何敢疾世王符解著書

史記貨殖傳刺繡文不如倚市門東漢王符隱居著書
三十篇以譏當世得失號曰潜夫論又皇甫規解官歸
安定鄉人有以貨得鴈門太守者亦去職還家書刺謁
規規卧不迎既入問卿在郡食鴈美乎有頃又白王符
在門規素聞符名乃驚遽而起衣不及帶屣履迎門援
符手而還與同坐極歡時人為之語曰徒見二千石不
如一逢掖

宿州次韻劉涇

劉涇字巨濟

我欲歸休瑟漸希舞雩何日著春衣多情白髮三千丈

無用蒼皮四十圍晚覺文章真小伎早知富貴有危機

為君垂涕君知否千古華亭鶴自飛

公自注涇之兄汴亦有文死矣

李白秋浦歌白髮三千丈綠愁似箇長杜子美古柏行霜皮溜雨四十圍黛色參天二十尺富貴危機晉諸葛長民語見七卷韓子華石淙莊詩注晉書陸機臨死歎曰華亭鶴唳豈可復聞乎

和李邦直沂山祈雨有應

高田生黃埃下田生蒼耳蒼耳亦已無更問麥有幾蛟龍睡足亦解慙二麥枯時雨如洗不知雨從何處來但聞呂梁百步聲如雷試上城南望城北際天菽粟青成

堆饑火燒腸作牛吼不知待得秋成否
半年不雨坐龍慵共怨天公不怨龍
今朝一雨聊自贖龍神社鬼各言功
無功日盜太倉穀嗟我與龍同此責
勸農使者不汝容因君作詩先自劾

杜子美詩雨降不濡物良田起黃埃莊子達生篇孔子觀於呂梁縣水三十仞流沫四十里王注呂梁今謂百步洪在彭城郡東龍神見法華經社鬼見漢王莽傳漢孫寶傳張忠辟為屬欲令殺子經更為除舍設儲儲寶自劾去韓退之詩家請官供不報答無異鼠雀偷太倉行拙手版付丞相不待彈劾還耕桑公詩亦此意

和孔密州五絕

見邸家園留題

大旆傳聞載酒過小詩未忍著磚磨陽關三疊君須秘
公自注來詩有渭城之句除卻膠西不解歌

王注漢於燉煌龍勒縣置陽關後人因以陽關名曲按
先生詩話舊傳陽關三疊然今世歌者每句再疊而已
若通一首言之又是四疊皆非是或每句二唱以應三
疊之說則叢然無復節奏余在密州有文勛長官者以
事至密自云得古本陽關其聲宛轉淒斷不類向之所
聞每句皆再唱而第一句不疊乃知古本三疊蓋如此
及在黃州偶讀樂天對酒詩云相逢且莫推辭醉聽唱
陽關第四聲注云第四聲勸君更盡一盃酒以此驗之
則第一句不疊審矣

春步西園見寄

歲歲開園成故事年年行樂不辜春今年太守尤難繼
慈愛聰明惠利人

漢馮奉世傳奉世子野王與弟立相代為上郡太守治
行畧相似吏民歌之曰大馮君小馮君兄弟繼踵相因
循聰明賢知惠吏民

東欄梨花

梨花淡白柳深青柳絮飛時花滿城惆悵東欄二株雪
人生看得幾清明

韓退之詩走馬城西惆悵歸不忍千株雪相映

和流杯石上草書小詩

蜂腰鶴膝嘲希逸春蚓秋蛇病子雲醉裏自書醒自笑

如今二絕更逢君

南史齊陸厥傳永明時盛為文章吳興沈約陳郡謝朓琅邪王融以氣類相推轂汝南周顒善識聲韻約等文皆用四聲制韻有平頭上尾蜂腰鶴膝之病世呼為永明體又謝莊字希逸王元謨問何者為雙聲疊韻答曰元氣為雙聲礪礪為疊韻晉王羲之傳蕭子雲近出擅名江表然僅得成書無丈夫之氣行行若縈春蚓字字如綰秋蛇唐張旭每醉或以頭濡墨而書既醒自視以為神不可復得也南史顧野王傳宣城王為揚州刺史

野王及王褒並為賓客王於東府起齋
令野王畫古賢王褒書贊時稱為二絕

堂後白牡丹

城西千葉豈不好笑舞春風醉臉丹何似後堂冰玉潔

游蜂非意不相干

公自注孔頗有聲妓而客無見者

後堂用張禹傳字詳見八卷張子野年八十五詩注晉衛玠傳嘗謂人有不及可以情恕非意相干可以理遣故終身不見喜怒之容

和趙郎中見戲

公自注趙以徐妓不如東武詩中見戲云只有當時燕子樓

燕子人亡三百秋卷

一作樓

簾那復似揚州西行未必能

勝此空唱崔徽上白樓

白樂天燕子樓詩序徐州故尚書張建封愛妓曰盼盼
張既沒第中有小樓名燕子盼盼念舊愛而不肯嫁居
是樓十餘年幽獨魂然卷簾用杜牧之詩已見四卷吉
祥寺賞牡丹詩注麗情集元微之崔徽傳云蒲女也裴
敬中使蒲徽一見動情不能忍敬中使回徽以不得從
為恨久之成疾寫真以寄裴且曰崔徽一旦不及卷中
人矣微之為作崔徽歌三國呂布傳魏太祖圍沛布登
白門樓圍急乃下降鄴道元水經註南門謂之白門
我擊藤牀君唱歌明年六十奈君何
公自注趙每醉歌畢輒曰明年六十
矣
醉顏只要裴風景莫向人前自洗磨

和子由與顏長道同游百步洪相地築亭種柳

平明坐衙不暖席歸來閉閣閑終日卧聞客至倒屣迎
兩眼蒙籠餘睡色城東泗水步可到路轉河洪翻雪白
安得青絲絡駿馬蹙踏飛波柳陰下奮身三丈兩蹄間
振鬣長鳴身自乾少年狂興久已謝但憶嘉陵遶劍關
劍關大道車方軌君自不去歸何難山中故人應大笑
築室種柳何時還

漢書汲黯傳黯多病卧閣內不出歲餘東海大治史記
張儀傳秦馬之良探前跌後蹄間三尋騰者不可勝數
三國志注劉備乘馬名的盧走墮檀溪中溺不得出備
急曰的盧今日死矣可努力乃一蹶三丈遂得出九域

志嘉陵江在果州一說出大散關南行劍門關東向閬中與涪水會戰國策蘇秦說齊宣王曰亢父之險車不得方軌馬不得並行

次韻李邦直感舊

騶騎傳呼出跨坊簿書填委入充堂誰教按部如何武只許清樽對孟光婉婉有時來入夢溫柔何日聽還鄉酸寒病守尤堪笑千步空餘僕射場

漢東方朔傳注騶奉廐之御也後以為騎謂之騶騎蕭望之傳仲翁出入從倉頭廬兒下車趨門傳呼甚寵王注出而騶騎傳呼則凌跨坊巷入而簿書填委則充滿堂廳或云跨坊乃籠街之義劉公幹詩職事煩填委文

墨紛消散漢書何武傳行部必先即學官見諸生試其
誦論問以得失然後入傳舍出記問壟田頃畝五穀美
惡已迺見二千石以為常韓退之詩孤遊懷耿介旅宿
夢婉婉趙飛燕外傳成帝見合德曰吾當老此溫柔鄉
不復效武皇老白雲鄉也韓贈張僕射
詩汴泗交流郡城角廝場千步平如削

與梁先舒煥泛舟得臨釀字二首

彭城古戰國孤客勸登臨汴泗交流處清潭百丈深故
人輕千里足壘來相尋何以娛佳客潭水洗君心

彭城徐州也古大彭氏國自春秋至唐末多戰爭之地
漢高項羽劉裕皆起彭城晉嵇康傳呂安服其高致每
一相思千里命駕戰國策蘇秦足重壘日百而舍造外
關願見於前口道天下之事李太白詩君思潁水潒忽

復歸嵩岑歸時莫
洗耳為我洗君心

老守厭簿書先生罷
函文風流魏晉間
談笑羲皇上河

洪一作河忽已過水色綠可釀
君無輕此樂此樂清且放

禮記非飲食之客則布席席間函文鄭氏謂講問之客也王注魏晉間士尚清談慕達節視名教吏事為俗又陶淵明自謂羲皇上人

次韻答邦直子由四首

增收一首公詩集云李清臣寄軾弟轍詩二首

批云可求子瞻和軾卻作詩二首和李清臣其內一首首句云五斗塵勞尚足留集中失載此詩今附於後又云軾又用弟轍韻與李清臣六首蓋東坡次韻通為八首集中止有

四首今收詩案一首猶逸其三也按所收詩施本又闕其半無他本可校姑仍之

簿書顛倒夢魂閒知我疎慵有見原閑作閑門僧舍冷
病聞吹枕海濤喧忘懷杯酒逢人共引睡文章信手翻

欲吐狂言喙三尺怕君嗔我卻須吞

公自注邦直屢以此見戒

韋應物郡齋詩惟我出塵意賞愛似僧家白樂天詩引
睡卧看書莊子徐無鬼立願有喙三尺朝野僉載陸餘
慶為洛州善論事而謬於判事時嘲
之曰說事喙長三尺判事手重五斤

城南短李好交游箕踞狂歌總自由尊主庇民君有道

樂天知命我無憂醉呼妙舞留連夜

公自注邦直家閑中舞者甚多

作清詩斷送秋蕭灑使君殊不俗樽前容我攬鬚不

繫辭樂天知命故不憂杜子美詩留連春夜舞攬鬚用桓伊撫箏事三見

老弟東來殊寂寞故人留飲慰酸寒草荒城角開新徑
雨入河洪失舊灘車馬追陪迹未掃唱酬往復字應漫
此詩更欲憑君改待與江南子布看

韓退之詩酸寒溧陽尉後漢杜密傳劉勝自蜀郡告歸鄉里閉門掃軌註云軌車迹也後漢橋衡傳初達潁川陰懷一刺無所之適至刺字漫滅典畧余曩聞劉荊州嘗自作書欲與孫伯符以示彌正平正平蚩之言如是為欲使孫策帳下兒讀之邪將使張子布見乎

君雖為我此遲留別後淒涼我已憂不見便同千里遠
退歸終作十年遊恨無揚子一區宅懶卧元龍百尺樓
聞道鵷鴻滿臺閣網羅應不到沙鷗

三國志陳登字元龍許汜見先主曰元龍湖海之士豪
氣不除昔遭亂過下邳見元龍無客主之意久不相與
語自上大牀卧使客卧下牀劉備曰君有國士之名而
求田問舍言無可採是元龍所諱也何緣當與君語如
我欲卧百尺樓上卧君於地何但上下牀
之間邪後漢儒林傳網羅遺逸博存眾家

五斗塵勞尚足留閉關卻欲治幽憂羞為毛遂囊中穎

口口龍逢地下遊

缺

文中子或問劉靈何人也曰古之閉關人也幽亮字出莊子已見前注史記平原君傳秦圍邯鄲平原君求合從於楚取於門下客得十九人有毛遂者自贊備員曰使遂得處囊中乃穎脫而出漢朱雲傳臣願賜尚方斬馬劍斷佞臣一人以厲其餘上問曰誰也對曰安昌侯張禹上大怒御史將雲下雲攀殿檻檻折雲呼曰臣得從龍逢比干遊於地下足矣

司馬君實獨樂園

青山在屋上流水在屋下中有五畝園花竹秀而野花香襲杖屨竹色侵盞掌樽酒樂餘春棋局消長夏洛陽古多士風俗猶爾雅先生卧不出冠蓋傾洛社雖云與

衆樂中有獨樂者才全德不形所貴知我寡先生獨何
事四海望陶冶兒童誦君實走卒知司馬持此欲安歸
造物不我捨名聲逐吾輩此病天所赅撫掌笑先生年
來效喑啞

孟浩然符公蘭若詩綠篠夾路旁清泉流舍下柳子厚
盤屋縣食堂記青山在前流水在下可以俯仰可以燕
樂澠水燕談司馬文正公以高才全德大得中外之望
士大夫識與不識稱之曰君實下至閭閻猷歆匹夫匹
婦莫不能道司馬公身退十餘年而天下之人日冀其
復用於朝漢蒯通傳足下欲持是安歸乎三國鍾會傳
謂所親曰我淮南已來畫無遺策四海共知持此安歸
後漢法真傳友人郭正稱之曰逃名而名我隨避名而

名我追王注古者刑人赭衣若莊子天刑之意耳舊注用始皇諸山非是烏臺詩案供此詩言四海蒼生望司馬光執政陶冶天下以譏見任執政不得其人又譏新法處處不便也

送顏復兼寄王鞏

顏復字長道魯人父名太初字醇之先師充公四十七世

孫號龜繹先生東坡為叙其文嘉祐中訪遺逸京東以長道應詔試者二十二人復為第一賜進士出身元祐初入為太常博士復遷二史經筵西掖以病改待制未拜而卒鞏字國定

彭城官居冷如水誰從我遊顏氏子我哀且病君亦窮
衰窮相守正其理胡為一朝捨我去輕衫觸熱行千里

問君無乃求之歟答我不然聊爾耳京師萬事日日新
故人如故今有幾君知牛行相君宅扣門但覓王居士
清詩草聖俱入妙別後寄我書連紙苦恨相思不相見
約我重陽嗅霜藥君歸可喚與俱來未應指目妨進擬
太一老仙閑不出

公自注張安道為中太一宮使鞏安道壻也

踵門問道今

時矣因行過我路幾何願君推挽加鞭箠吾儕一醉豈

易得買羊釀

一作酤

酒從今始

韓退之贈張籍詩子又捨我去我懷焉所窮牛行鞏大父文正公居牛行街見徐度南牕記史記范睢傳鄭安

平言於王稽曰臣里中有張祿先生欲見君言天下事
其人有仇不敢書見王稽曰夜與俱來漢陳勝傳旦日
卒中往往指目勝廣舊唐書李珣傳文宗語珣曰實易
直勸我凡宰相進擬五取三三取一韓退之詩買羊酤
酒謝不敏

蝎虎

黃雞啄蝎如啄黍
牕間守宮稱蝎虎
閣中繳尾伺飛蟲
巧捷功夫在腰脊
跂跂脉脉善緣壁
陋質從來誰比數
今年歲旱號蜥蜴
狂走兒童鬧歌舞
能銜渠水作冰雹
便向蛟龍覓雲雨
守宮努力搏蒼蠅
明年歲旱當求汝

漢東方朔傳上嘗使諸數家射覆置守宮盂下射之皆不能中朔曰臣以為龍又無角謂之為蛇又有足跂跂以器養之食以丹砂體盡赤搗之以點女人支體終身不滅姪則點落故號守宮顏師古漢書注亦云揚雄方言在澤中者謂之蜥蜴楊文公談苑魏庠言昔游關中佛寺見沙門有善胡法者置蜥蜴甕中使童男女數十衣青衣同聲呪曰蜥蜴蜥蜴興雲吐霧雨今滂沱放汝歸去歲旱為之頗有應

子由將赴南都與余會宿於逍遙堂作兩絕句
讀之殆不可為懷因和其詩以自解余觀子由
自少曠達天資近道又得至人養生長年之訣

而余亦竊聞其一二以為今者宦游相別之日
淺而異時退休相從之日長既以自解且以慰

子由云

子由道遙堂詩序云轍幼從子瞻讀書未嘗一日相舍既壯將遊宦四方讀書

蘇州詩至那知風雨夜復此對牀眠惻然感之乃相約早退為閑居之樂故子瞻始為鳳翔幕府留詩為別曰夜雨何時聽蕭瑟其後子瞻通守餘杭復移守膠西而轍滯留於淮陽濟南不見者七年熙寧十年二月始復會於澶濮之間相從彭城留百餘日時宿於逍遙堂追感前約為作二小詩其一載首卷與子由別於鄭州西門詩註其一云秋來東閣涼如水客至山公醉似泥困卧北牕呼不醒風吹松竹雨淒淒

別期漸近不堪聞風雨蕭蕭已斷魂猶勝相逢不相識
形容變盡語音存

李太白通塘曲相逢不相識出沒繞通塘後漢夏馥傳
黨錮事起馥自剪須變形隱匿姓名為冶家傭形貌毀
瘁人無知者弟靜遇馥不
識聞其言聲乃覺而拜之

但令朱雀長金花此別還同一轉車五百年間誰復在
會看銅狄兩咨嗟

陰真君金液還丹歌北方正氣為河車東方甲乙成丹
砂兩情合養歸一體朱雀調護生金花注云朱雀火也
後漢蘄子訓傳人於長安東霸城見之與一老翁
共摩挲銅人相謂曰適見鑄此今已近五百歲矣

留題石經院三首

蔥蒨門前路行穿翠密中卻來堂上看巖谷意無窮

天矯庭中檜枯枝鵲踏消瘦皮纏鶴骨高頂轉龍腰

窈窕山頭井潛通伏澗清欲知深幾許聽轉一作轉轆轤

聲

過雲龍山人張天驥

郊原雨初足風日清且好病守亦欣然肩輿白門道荒
田咽蛩蚓村巷懸梨棗下有幽人居閉門空雀噪西風

高正厲落葉紛可掃孤童卧斜日病馬放秋草墟里通

有無垣牆任摧倒君家本冠蓋絲竹鬧鄰保脫身聲利

中道德自濯澡躬耕抱羸疾奉養百歲老詩書膏吻頰

菽水媚翁媪

鳥老反

饑寒天隨子杞菊自擷萼慈孝董邵

南雞狗相乳抱吾生如寄耳歸計失不早故山豈敢忘

但恐迫華皓從君好

一作學

種秫斗酒時自

一作相

勞

白門見本卷和趙郎中見戲詩注顏延年詩反同幽人居郊廬常晝閑晉陶潛傳躬耕自資遂抱羸疾揚雄方言周晉秦隴謂父曰翁漢高祖紀母媪注幽州及漢中皆謂老嫗為媪又曰媪女老稱也陸龜蒙杞菊賦序天

隨生宅荒前後皆樹以杞菊春苗恣肥得以采擷詩國
風采采芣苢薄言擷之又參差荇菜左右芼之董邵南
事詳十卷蘇州姚氏三瑞堂詩魏明帝樂府人生如寄
多憂何為法苑珠林支遁在剡謝安與書云人生如寄
耳終日戚戚遲君來以晤言消之種秫用陶潛事注見
七卷漢楊惲傳田家作苦歲時伏臘烹羊羔斗酒自
勞

贈王仲素寺丞

公自注
名景純

養氣如養兒棄官如棄泥人皆笑子

一作子

拙事定竟誰

迷歸耕獨患貧問子

一作子

何所齎尺宅足自庇寸田有

餘畦明珠照短褐陋室生虹霓雖無孔方兄顧有法喜

妻彈琴一長嘯不答阮與嵇曹南劉夫子名與子政齊
家有鴻寶書不鑄金裹蹄促膝問道要遂蒙分刀圭不
忍獨不死尺書有見梯我生本強鄙少以氣自擠孤舟
倒江河赤手攬象犀年來稍自笑留氣暖下臍苦恨聞
道晚意象颯已淒空見孫思邈區區賦病梨

老子專氣致柔能如嬰兒乎醫經欲養兒慎風池黃庭
經寸田尺土以治生兩眉間為上丹田心為絳宮田臍
下三寸為下丹田晉魯褒錢神論錢之為體有乾坤之
象親之如兄字曰孔方維摩經法喜以為妻慈悲以為
女晉孫登傳登好讀易撫一弦琴見者皆親樂之文帝
聞之使阮籍往與語不應嵇康又從之游三年問其所

圖終不答長嘯即孫登事注見八卷惠山謁錢道人詩
劉夫子或云謂劉誼王注先生在惠州時有書與宜翁
咨問道要自以杜門屏居胸中廓然實無荆棘有受道
之質且曰或有外丹已成可助黎藁者望不惜分惠其
書載毗陵後集一曰劉安世待制字器之曹南人得養
生煉丹術公嘗師之漢楚元王傳劉向字子政本名更生
淮南王有枕中鴻寶苑秘書言神仙使鬼物為金之
術更生父德治淮南獄得其書更生幼而讀誦以為奇
獻之上今典尚方鑄作事方多不驗乃下更生吏漢武
帝紀太始二年詔更黃金為麟趾褭蹄韓愈博士李君
墓誌余自袁州還京師襄陽東舸邀我於蕭洲屏人曰
我得祕藥不可獨不死今遺子一器襄陽孟簡也時為
節度使唐廬照鄰得惡疾從孫思邈問養生
之道庭前有病梨樹照鄰乃作賦以自悲

陽關詞三首

王注三詩各自說事意皆可以陽
關之聲歌之乃聚為一處標其題

曰陽關

三絕云

受降城下紫髯郎戲馬臺前古戰場恨君不取契丹首

金甲牙旗歸故鄉

漢匈奴傳令因杆將軍築受降城唐書朔方總管張仁愿於河北築三受降城以絕突厥南寇之路三國張遼問吳降人向有紫髯將軍為誰答曰孫會稽又見七卷戲馬臺在彭城南項羽所作蕭子顯齊書武帝為宋公在彭城九日出戲馬臺至今相承以為舊準唐李華吊古戰場文浩浩乎平沙無垠負不見人河水縈帶羣山糾紛亭長告余曰此古戰場也常覆三軍往往鬼哭天陰則聞兵書曰牙旗將軍之旗

右贈張繼愿

濟南春好雪初晴行到龍山馬足輕使君莫忘雪谿女
時作陽關腸斷聲

唐地理志齊州濟南郡劉禹錫詩唱得陽關意外聲舊
人惟有來嘉榮郝昂樂府解題許永新歌奏慢聲喜者
聞之氣勇愁者聞之腸斷

右答李公擇

李公擇先知湖州自湖移
濟南公故以雪谿女戲之

暮雲收盡溢清寒銀漢無聲轉玉盤此生此夜不長好
明月明年何處看

李太白詩小時不
識月喚作白玉盤

右中秋月

和孔周翰二絕

再觀邸園留題

小園香霧曉蒙籠醉手

一作守

狂詞未必工魯叟錄詩應

有取曲收彤管邶鄘風

詩國風靜女其嬈貽我彤管箋云彤管筆赤管也古者后夫人必有女史事無大小記以成法王注當聞高密老儒之言曰邶氏有賢婦孀居不嫁其節甚高故公此詩用靜女彤管邶鄘之風也

觀淨觀堂効韋蘇州詩

弱羽巢林在一枝幽人蝸舍兩相宜樂天長短三千首
卻愛韋郎五字詩

莊子逍遙遊鵲巢於深林不過一枝高士傳焦先作蝸牛廬呻吟其中注已見前白氏文集記樂天有文集七帙合六十七卷凡三千四百七首舊唐書白居易與元微之書云韋蘇州歌行清麗之外頗近興調其五言又高雅閒澹自成一家之體今之秉筆者誰能及之然當蘇州在時人亦未甚愛重必待身死後則愛之

京師哭任遵聖

任遵聖名孜眉山二卷有送任孜通判黃州兼寄其兄孜作

下篇答任師
中即任也

十年不還鄉兒女日夜長豈惟催老大漸復成凋喪每

聞耆舊亡涕泣聲輒放老任况竒逸先子推輩行文章

得少

一作小得

譽詩語尤清壯吏能復所長談笑萬夫上自

喜作劇縣偏工破豪黨奮髯走猾吏嚼齒對姦將哀哉
命不偶每以才得謗竟使落窮山青衫就黃壤宦游久
不樂江海永相望退耕本就君時節相勞餉此懷今不
遂歸見壘壘葬望哭國西門落日銜千嶂平生惟一子
抱負珠在掌見之齟齬中已有食牛量他年如入洛生
死一相訪惟有王濬冲心知中散狀

禮記孔子泣然流涕晉阮籍傳文帝讓九錫公卿將勸
進使籍為其辭籍沉醉忘作臨詣府使取之見籍方據
按醉眠使者以告籍便書案使寫之無所改竄辭甚清
壯漢灌嬰傳景帝曰魏其沾沾自喜耳晉書袁甫嘗詣
何勗自言能為劇縣勗問惟欲宰縣不為臺閣職何也
甫曰人各有能與不能奮髯用前漢朱博事注已見唐
書張巡裂眦血面齧齒皆碎潘安仁懷舊賦墳壘累以
接隴栢森森以攢植杜子美詩掌中貪見一珠新韓詩
外傳男子八月生齒八歲而齠齒女子七月生齒七歲
而齠齒尸子虎豹之駒雖未成文已有食牛之氣韓愈
別實司直詩行當挂其冠生死君一訪晉嵇紹中散大
夫康之子也紹始入洛或謂王戎曰昨於稠人中始見
嵇紹昂昂如野鶴之在雞羣戎
曰君復未見其父爾濬冲戎字

答任師中家漢公

先君昔未仕杜門皇祐初道德無貧賤風采照鄉閭何
嘗疎小人小人自濶疎出門無所詣老史在郊墟門前
萬竿竹堂上四庫書高樹紅消梨小池白芙蕖常呼赤
腳婢雨中擷園蔬矯矯任夫子罷官還舊廬是時里中
兒始識長者車烹雞酌白酒相對歡有餘有如龐德公
往還葛與徐妻子走堂下主人竟誰歟我時年尚幼作
賦慕相如侍立看君談精悍實起予歲月曾幾何耆老
逝不居史侯最先沒孤墳拱桑楸我亦涉萬里清血滿

襟袂漂流二十年始悟萬緣虛獨喜任夫子老佩刺史
魚威行烏白蠻解辦請冠裾方當入奏事清廟陳璠璵
胡為厭軒冕歸意不少紓上蔡有良田黃沙走清渠罷
亞百頃稻雍容十年儲閒隨李丞相搏射鹿與豬蒼鷹
十斤重猛犬如黃驢豈比陶淵明窮苦自把鋤我今四
十二衰髮不滿梳彭城古名郡乏人偶見除頭顱已可
知幾何不樵漁會當相從去芒鞋老菑畬念子瘴江邊
懷抱向誰攄賴我同年友相歡出同輿冰盤薦文鮪自公

注鮪鮓也
我瀘常有

玉笋傾浮蛆醉中忽思我清詩綴瓊琚知我

少詆

一作所


諧教我時卷舒世事日反覆翩如風中旗雀

羅弔廷尉秋扇悲婕妤升沉一何速喜怒紛衆狙作詩

謝二子我師寧與遽

王注先君言編禮也皇祐仁宗年號又老史名經字彥輔眉之老儒嘗作思子臺賦公甚稱之唐藝文志兩都各聚書四部以甲乙丙丁為次列經史子集四庫其本有正副軸帶牙籤皆異色以別之三秦記漢武帝園有大梨如五升瓶落地則碎名含消梨漢陳平傳平家貧門外多長者車轍龐德公事詳十一卷寄題刁景純詩注漢揚雄傳先是司馬相如作賦弘麗溫雅雄心壯之每作賦嘗擬之以為式杜子美詩草玄吾豈敢賦或似

相如漢嚴延年傳為人短小精悍敏捷於事梁益州記
雋州其地接諸蠻部有烏蠻白蠻杜子美詩山帶烏蠻
濶又烏蠻瘴遠隨漢書終軍傳將有解編髮削左衽繫
冠帶要衣裳而蒙化者焉注編讀曰辮逸論語璠璣魯
之寶玉也孔子曰美哉遠而望之煥若也近而視之瑟
若也罷亞木名本作擺紐已見七卷注史記李斯傳為
秦丞相下吏顧其子曰吾欲與若復牽黃犬俱出上蔡
東門逐狡兔豈可得乎又見首卷石鼓詩注按師中嘗
為蔡州新息令邑人愛之為買田故用上蔡東門事晉
夏侯湛傳與潘岳友善每出同輿接茵周禮獻人春獻
王鮪詩國風投我以木瓜報之以瓊琚雀羅衆狙注竝
見前文選趙飛燕姊弟得幸班婕妤失寵作紈扇曲云
常恐秋節至涼飈奪炎熱棄捐篋笥中恩情中道絕寧
遽寧武子遽伯玉也潘安仁閑居賦雖吾顏之云厚猶
內媿於
寧遽



施註蘇詩卷十二

欽定四庫全書

集部

施註蘇詩卷十三

四

詳校官庶吉士臣李傳熊

檢討臣何思鈞覆勘

覆校官中書臣宋 鎔

校對官主事臣龔敬身

謄錄監生臣范 墉

欽定四庫全書

施註蘓詩卷十三

宋 蘓軾 撰

施元之原註

武進邵長蘅刪補

詩四十一首

時守彭
城作

初別子由

我少知子由天資和而清好學老益堅表裏漸融明
豈獨為吾弟要是賢友生不見六七年微言誰與賡
常恐坦率性放縱不自程會合亦何事無言對空枰
使人之意消不善無由萌森然有六女包裹布與荆
無憂賴賢婦藜藿等大烹使子得行意青衫陋公
卿明日無晨炊倒牀作雷鳴秋眠我東閣夜聽風雨
聲懸知不久別妙理難一作重細評昨日忽出門孤舟
轉西城歸來北堂上古屋空崢嶸退食悞相從入門

中自驚南都信繁會人事水火爭念當閉閣坐頽然
寄龍首妻子亦細事文章固虛名會須掃白髮不復
用黃精

詩小雅雖有兄弟不如友生王註子由題先生像贊亦
云人曰吾兄我曰吾師朝野僉載唐德宗夏中微行西
明寺宋濟方葛巾捉鼻抄書上曰措大茶求一椀濟曰
鼎水方煎有茶可自潑之又問作何事業是何姓行濟
曰姓宋第五應進士舉須臾聞呼官家濟皇恐起拜上
曰宋五大坦率後聞禮部放榜上令探濟無名曰宋五
又坦率也韋弘嗣博奕論所志不出一枰之上所務不
過方罫之間唐韻枰博局也莊子田子方篇東郭順子
其為人也正容以悟物使人之意也消後漢梁鴻傳妻
荆釵布裙風雨聲用韋應物詩意王註南都則南京也

時子由從張丈定簽書南京判為此別也韓集石鼎聯
句妄使水火爭五代史弘肇傳會飲王章第蕪逢吉戲
之弘肇大怒以醜語詬逢吉由是將相如水火杜子
美丈人山詩掃除白髮黃精在君看他時冰雪容

次韻呂梁仲屯田

雨葉風花日夜稀一杯相屬竟何時空虛豈敢酬瓊玉
枯朽猶能出茵芝門外呂梁從迅急胸中雲夢自逶遲
待君筆力追靈運莫負南臺九日期

庾信屏風詩風花直亂回唐孟遲懷鄭洎詩風蘭舞幽
香雨葉墮寒滴柳子厚與蕭俛書雖朽拚敗腐猶足蒸
出芝菌以為瑞物呂梁雲夢注竝見前宋武迷征記九
月九日王登戲馬臺宴百僚賦詩作者百餘人謝靈運

最為

工

章質夫寄惠崔徽真

崔徽註
已見

玉釵半脫雲垂耳
亭亭芙蓉在秋水
當時薄命一酸辛
千古華堂奉君子
水邊何處無麗人
近前試看丞相嗔
不如丹青不解語
世間言語原非真
知君被惱更愁絕
卷贈老夫驚老拙
為君援筆賦梅花
未害廣平心似鐵

郭子橫洞冥記元昂元年起招靈閣有神女留一玉釵
與帝帝以賜趙婕妤至昭帝元鳳中宮人猶見此釵共
謀欲碎之明日視釵匣惟見白燕直飛昇天後宮人作
釵因名玉燕釵李賀詩寒鬢斜釵玉燕光華徽靈姻傳

雲髮垂耳李太白詩清水出芙蓉天然去雕飾又李樂府有妾薄命篇杜子美麗人行三月三日天氣新長安水邊多麗人又慎莫近前丞相嗔楊貴妃遺事太液池有千葉白蓮帝指妃示左右曰何如我解語花杜子美絕句江上被花惱不徹無處告訴只顛狂唐皮日休桃花賦序余嘗嘉宋廣平之為相貞姿勁質剛態毅狀疑其鐵腸石心不解吐婉媚詞然梅花賦清便富艷得南朝徐庾體殊不類其為人也

王鞏屢約重九見訪既而不至以詩送將官梁
交且見寄次韻荅之交頗文雅不類武人家有
侍者甚惠麗

知君月下見傾城破恨懸知酒有兵老守亡何惟日飲

將軍競病自詩鳴花枝不共秋歌帽筆陣空來夜斫營
愛惜微官將底用他年只好寫銘旌

南史江諮議有言酒猶兵也兵可千日而不用不可一
日而不備酒可千日而不飲不可一飲而不醉唐韓偓
詩酒衝愁陣出奇兵日飲競病註竝再見韓退之送孟
東野序東野始以其詩鳴其高出魏晉不懈而及於古
杜子美醉歌行筆陣獨掃千人軍吳志甘寧傳受救出
所敵前營至二更時銜枚出所敵敵驚動遂退白樂天
詩晝聽笙歌夜斫營禮記銘明旌也以死者為不可別
已故以其旗識之杜牧之詩黃壤不需新雨露粉書空
換舊銘旌

臺頭寺雨中送李邦直赴史館分韻得憶字人

字無寄孫巨源二首

霜林日夜西風急老送君歸百憂集清歌窈眇入行雲
雲為不行天為泣紅葉黃花秋正亂白魚紫蟹君須憶
憑君說向髯將軍衰鬢相逢應不識

杜子美詩悲見生涯百憂集漢元帝紀帝自度曲被歌
聲分判節度窮極幼眇外戚傳武帝悼李夫人賦惟幼
眇之相羊註幼眇猶窈窕也列子秦青撫節悲歌聲振
林木響遏行雲五行志無雲而雨為雨泣髯將軍注再
見白樂天詩相逢應不識滿領白髭鬚

珥筆西歸近紫宸太平典冊不緣麟付君此事寧論晉

載我當時舊過秦門外想無千斛米墓中知有百年人

看君兩

一作雙

眼明如鏡休把春秋坐素臣

文選曹植表執鞭珥筆註戴筆也潘岳贈陸機詩優游
省闕珥筆華軒史記孔子世家西狩獲麟曰吾道窮矣
乃因史記作春秋晉陳壽傳壽撰三國志時人稱其善
敘事有良史之才張華深善之謂壽曰當以晉書相付
耳賈誼過秦論史記秦本紀漢書項籍傳皆載其略晉
陳壽傳丁儀丁廙有盛名於魏陳壽謂其子曰可覓千
斛米當為尊公作佳傳子不與竟不作傳集異記鄭郊
過一冢上有竹兩竿青翠可愛吟曰墓上兩竿竹風吹
長裊裊久不能續忽聞冢中人賡之曰下有百年人長
眠不知曉王註詩意言必不如陳壽之希求當念墓中
之人而發其潛光也韓退之論史書左邱明紀春秋時
事以失明杜預左氏傳序說者以為仲尼自衛反魯修

春秋立素王邱明為素臣漢昭帝紀大將軍國家忠臣
敢有譖毀者坐之公詩案熙寧十年九月內李清臣差
知國史軾作詩送清臣云付君此事寧論晉載我當時
舊過秦軾於仁宗朝曾進論往古得失軾妄以賈誼自
比意欲李清臣於國
史中載軾所進論也

代書答梁先

此身與世真悠悠蒼顏華髮誰汝留強名太守古徐州
忘歸不如楚沐猴魯人豈獨不知邱隣藉夫子無罪尤
異哉梁子清而脩不遠千里從我游瞭然正色懸雙眸
世之所馳子獨不一經通明傳節侯小楷精絕規摹歐

公自註梁生我衰廢學懶且媮畏見問事實長頭別來學歐陽公書

紅葉黃花秋夜夢見之起坐愁遺我駁石盆與甌黑質白章聲琳球謂言山石生澗溝追琢尚可王公羞感子

佳意能無酬反將木瓜報珍投學如富貴

一作賈

在博收

仰取俯拾無遺籌道大如天不可求修其可見致其幽願子篤實慎勿浮發憤忘食樂忘憂

漢百官表郡守秦官景帝中二年更名太守家語魯人不識孔子聖人乃曰彼東家丘者吾知之矣莊子讓王篇夫子再逐於魯殺夫子者無罪藉夫子者無禁漢韋賢傳號稱鄒魯大儒子玄成復以明經位至丞相賢薨

謚節侯漢韓信傳媼衣靡食註媼苟且也賈長頭註見
十卷贈上天竺辯才詩漢司馬相如傳白質黑章其儀
可喜詩大雅追琢其章金玉其相左傳隱三年苟有明
信澗谿沼沚之毛可薦於鬼神可羞於王公左太冲蜀
都賦賁實時味王公羞焉詩國風投我以木瓜報之以
瓊琚漢書貨殖傳魯人俗儉嗇而丙氏尤甚家自父兄
子弟約類有
拾印有取

九日邀仲屯田為大水所隔以詩見寄次其韻

無復龍山對孟嘉西來河伯意雄夸霜風可使吹黃帽

公自註舟人黃帽土勝水也

樽酒那能泛浪花漫遣鯉魚傳尺素却

將燕石報瓊華何時得見悲秋老醉裏題詩字半斜

河伯用莊子秋水篇詳七卷八月十五日看潮詩註杜
子美詩纜侵隄柳繫幔卷浪花浮毛詩國風尚之以瓊
華乎而闢子宋之愚人得燕石梧臺之東歸而藏之以
為大寶杜九日詩老去悲秋強自寬又詩作詩呻吟內
墨淡字
歌傾

河復并序

熙寧十年秋河決澶淵注鉅野入淮泗自澶魏以
北皆絕流而濟楚大被其害彭門城下水二丈八
尺七十餘日不退吏民疲於守禦十月十三日澶
州大風終日既止而河流一枝已復故道聞之喜

甚庶幾可塞乎乃作河復詩歌之道路以致民願
而迎神休蓋守土者之志也

君不見西漢元光元封間河決瓠子二十年鉅野東傾
淮泗滿楚人恣食黃河鱣萬里沙回封禪罷初遣越巫
沈白馬河公未許人力窮薪芻萬計隨流下吾君仁聖
如帝堯百神受職河神驕帝遣風師下約束北流夜起
澶州橋東風吹凍收微淥神功不用淇園竹楚人種麥
滿河淤仰看浮槎棲古木

溝洫志孝武帝元光中河決瓠子東南注鉅野通於淮
泗上使汲黯鄭當時興人徒塞之輒復壞後二十餘年
歲因以數不登上既封禪巡祭山川其明年乾封少雨
乃使汲仁郭昌發卒數萬塞瓠子決河於是上以用事
萬里沙則還自臨決河湛白馬玉璧令羣臣從官自將
軍以下皆負薪寘決河是時東郡燒草以故薪柴少而
下淇園之竹以為楨帝悼功之不成作歌曰皇謂河公
兮何不仁又曰河公許兮薪不屬卒塞瓠子築宮其上
名曰宣防柳子厚詩渡頭水
落村徑成掩亂浮槎在高樹

登望硤亭

此詩墨蹟乃欽宗東宮舊藏今在曾
文清家宿嘗刻石餘姚縣治東坡題

云僕在彭城大水後登望硤亭偶留此詩已
而忘之其後徐人有誦之者徐思之乃知其
為僕詩也集中無
之以入河復詩後

河漲西來失舊碕孤城渾在水光中忽然歸壑無尋處
千里禾麻一半空

韓幹馬十四匹

二馬並驅攢八蹄二馬宛頸駿尾齊一馬任前雙舉後
一馬却避長鳴嘶老髯奚官騎且顧前身作馬通馬語
後有八匹飲且行微流赴吻若有聲前者既濟出林鶴
後者欲涉鶴俛啄最後一匹馬中龍不嘶不動尾搖風
韓生畫馬真是馬蘇子作詩如見畫世無伯樂亦無韓

此詩此畫誰當看

韓非子伯樂教二人相蹠馬相與之簡子廐觀馬一人
舉蹠馬其一人從後而循之三撫其尻而馬不蹠此自
以為失相其一人曰子非失相也此其為馬也蹠肩而
腫膝夫蹠馬也者舉後而任前踵膝不可任也故後不
舉王充論衡漢楊翁偉乘蹠馬出遇放馬翁偉謂其御
曰放馬目眇御曰何以知之曰彼罵轅中馬曰蹠此馬亦
罵之曰眇其御往視之果眇馬也北夢瑣言浙人劉三
復能記三生事云曾為馬馬常患渴望驛而嘶傷其蹠
則連心痛漠東方朔傳尻益高者鶴俛啄也杜子美丹
青引斯須九重真龍出一洗萬古凡馬空又天育驃騎
歌是何意態雄且傑
駿尾蕭梢朔風起

有言郡東北荆山下可以溝畎積水因與吳正

字王戶曹同往相視以地多亂石不果還游聖

女山山有石室如墓而無棺槨或云宋司馬桓

魑墓二子有詩次其韻二首

按公遊桓山記云元豐二年正月乙

亥春服既成從二三子云有詩別見十六卷王注入此悞

側手區區未易遮奔流一瞬卷千家共疑智伯初圍趙
猶有張湯欲漕斜已坐迂疎來此地分將勞苦送生涯
使君下策真堪笑隱隱驚雷響踏車

時河決水方退訪有側手障黃河之語戰國策智子攻趙襄子走晉陽圍而灌之城不浸者三版漢溝洫志有

上書欲通褒斜道及漕事下御史大夫張湯言褒水通
汧斜水通渭皆可以行船漕上以為然拜湯子卬為漢
中守發數萬人作褒斜道五百餘里又待詔賈讓言治
河有上中下策若乃繕完故堤增卑倍薄勞費無已數
逢其害此
最下策也

茫茫清泗遠孤岑歸路相將得暫臨試著芒鞋穿犖确
更然松炬照幽深縱令司馬能鑿石奈一作會有中郎解

摸金強寫蒼崖留歲月他年誰識此時心

九域志徐州泗水今呼清河南史顧歡好學而貧夕則
燃松節讀書禮記孔子居於宋見桓司馬自為石椁三
年而不成夫子曰若是其靡也死不如速朽之愈也三
國陳琳為袁紹作檄書言曹操置發丘中郎將摸金校

尉所過隨窺
無骸不露

贈寫御容妙善師

憶昔射策干先皇
珠簾翠幄分兩廂
紫衣中使下傳詔
跪奉冉冉聞天香
仰觀眩晃目生暈
但見曉色開扶桑
迎陽晚出步就坐
絳紗玉斧光照廊
野人不識日月角
仿髯尚記重瞳光
三年歸來真一夢
橋山松檜淒風霜
天容玉色誰敢畫
老師古寺晝閉闌
一作房夢中神授心
有得覺來信手筆
已忘幅巾常服儼
不動孤臣入門涕

自滂元老侑坐鬚耆古虎臣立侍

一作侍立

冠劍長平生慣

寫龍鳳質肩顧草間猿與麋都人踏破鐵門限黃金白
壁空堆牀爾來摹寫亦到我謂是先帝白髮郎不須覽
鏡坐自了明年乞身歸故鄉

西京雜記漢昭陽殿織珠為簾左思吳都賦藹藹翠幄
爾雅東西廂謂之序楚辭九歌瞰將出兮東方照吾檻
兮扶桑迎陽禁中門名唐唐儉傳高祖嘗召訪之儉曰公
日角龍庭姓協圖讖係天下望久矣漢項羽傳舜重瞳
子項羽亦重瞳子史記黃帝崩葬橋山詩國風涕泗滂
沱唐書太宗方四歲有書生相之曰龍鳳之姿天日之
表必能濟世安民李揆傳龍章鳳姿尚不見用麋頭鼠
目子乃求官耶文房四譜隋僧智永善書人求題頭門

限穿穴乃以鐵葉裹之號鐵門限白髮郎用顏駟事詳
十一卷董儲郎中詩註杜子美詩上疏乞骸骨黃冠歸
故鄉

哭刁景純

刁景純名約丹徒人少卓越刻苦學問能文章始應舉京師與歐陽永叔

富彥國聲譽相高下天聖二年登進士第屈
於為郎施不大耀士友歎惜而景純未嘗以
為恨好急人之難海內識與不識多歸之不
治產業賓客故人常滿其門尊酒燕娛無虛
時重義輕施有古
人之風壽八十四

讀書想前輩每恨生不早紛紛少年場猶得見此老此
老如松柏不受霜雪槁直從毫末中自養到合抱宏材

乏近用千歲自枯倒文章餘正始風節貫華皓平生為
人耳自為薄如縞是非雖難齊反覆看愈好前年旅吳
越把酒慶壽考扣門無晨夜百過迹未掃但知從德公
未省厭丘嫂別時公八十後會知難保昨日故人書連
年喪翁媼公自註景純妻先亡傷心范橋水漾漾舞寒藻華堂不
見人瘦馬空戀早我欲江東去匏樽酌行潦鏡湖無賀
監慟哭稽山道忍見萬松岡荒池沒秋草

老子合抱之木生於毫末晉衛玠傳謝鯨雅重玠相見
欣然言論彌日王敦曰不意永嘉之末復聞正始之音

再見德公詳見十一卷題藏春塢詩註漢楚元王傳高祖微時常避事時時與賓客過其邱嫂食嫂厭叔與客來陽為羹畫轅釜客以故去已而視釜有羹由是怨嫂范橋潤州范公橋以文正公得名楊雄方言梁宋齊楚之間謂櫪曰阜唐書賀知章字季真天寶初上章請度為道士有詔賜鏡湖剡川一曲李白詩欲向江東去定將誰舉杯稽山無賀老卻棹酒船回晉阮籍傳車迹所窮輒慟哭而返萬松岡在景純藏春塢見八卷景純見詩和

答呂梁仲屯田

亂山合沓圍彭門官居獨在懸水村

公自註懸水村呂梁地名

居民

蕭條雜廩鹿小市冷落無雞豚黃河西來初不覺但訝

清泗流奔渾夜聞沙岸鳴壑盡曉看雪浪浮鵬鷗呂梁
自古喉吻地萬頃一抹何由吞坐觀入市巷閭井吏民
走盡餘王尊計窮路斷欲安適吟詩破屋愁鳶蹲歲寒
霜重水歸壑但見屋瓦留沙痕入城相對如夢寐我亦
僅免為魚鼃旋呼歌舞雜詼笑不惜飲釀空餅盆念君
官舍冰雪冷新詩美酒聊相溫人生如寄何不樂任使
絳蠟燒黃昏宣房未築淮泗滿故道堙滅瘡痍存明年
勞苦應更甚我當畚鍤先黥髡付君萬指伐頑石千鎚

雷動蒼山根高城如鐵洪口快談笑卻掃看崩奔農夫
掉臂免狼顧秋穀布野如雲屯還須更置軟脚酒為君
擊鼓行金樽

韓退之詩餘瀾怒不已喧聒鳴鑿盎漢嚴延年傳河南
天下喉咽也顏師古曰言其所在襟要如人體之有喉
咽也漢王尊傳為東郡太守河水盛溢泛浸瓠子金堤
老弱奔走尊投沉白馬祀水神河伯尊執圭璧使巫策
祝請以身填金堤因止宿堤上堤壞吏民皆奔走唯一
主簿泣在尊旁立不動而水波稍卻回還杜子美羌村
詩夜闌更秉燭相對如夢寐左傳昭二年劉子曰微禹
吾其魚乎禮記盛於盆尊於鉶杜子美遭田父泥飲詩
叫婦開大鉶盆中為吾取宣房卽宣防見本卷河復詩
註又瓠子歌曰蓄桑浮兮淮泗滿謝靈運詩圻岸屢崩

奔軟脚字見唐書楊國忠傳詳
五卷鹽官部役戲呈同事詩註

張寺丞益齋

張寺丞名恕字忠甫文定公安道子

張子作齋舍而以益為名吾聞之夫子求益非速成譬
如遠游客日夜事征行今年適燕薊明年走蠻荆東觀
盡滄海西涉渭與涇歸來閉戶坐八方在軒庭又如學
醫人識病由飽更風雨晦明淫跛蹙瘖聾盲虛實在其
脉靜躁在其情榮枯在其色壽夭在其形苟能閱千人
望見知死生為學務日益此言當自程為道貴日損此

理在既盈願言書此詩以為益齋銘

左傳昭元年天有六氣淫生六疾氣曰陰陽風雨晦明也
分為四時序為五節過則為災史記扁鵲傳扁鵲望見
桓侯而退走曰疾在骨髓雖司命無奈之何互見四
卷和劉道原詠史詩註老子為學日益為道日損

答孔周翰求書與詩

身閑曷不長閉口天寒正好深藏手吟詩寫字有底忙
未脫多生宿塵垢不蒙譏訶子厚疾反更刻畫無鹽醜
征西自有家雞肥太白應驚飯山瘦與君相從知幾日
東風待得花開否撥棄萬事勿復談百觚之後那詞一作

辭酒

史記張儀傳願陳子閉口無復言韓退之詩有底忙時
不甞來柳子厚荅崔書凡人好辭工書皆病癖也吾不
幸蚤得二病學道以來日思砭鍼攻熨卒不能去吾子
乃始欽欽思易吾病不亦惑乎又互見二卷石蒼舒醉
墨堂詩註晉周顗傳庾亮謂顗曰諸人咸以君方樂廣
顗曰何乃刻畫無鹽唐突西施家雞詳八卷柳氏二外
甥求筆跡詩註飯山瘦用李白飯顗山頭詩意詳九卷
次韻沈長官註孔叢子昔平原君與子高飲強子高酒
曰昔有遺謗堯舜千鐘孔子百觚子路嗑嗑
尚飲百榼古之賢聖無不能飲子何辭焉

送李公恕赴闕

君才有如切玉刀見之凜凜寒生毛願隨壯士斬蛟蜃

不願腰間纏錦條用違其才志不展坐與胥吏同疲勞
忽然眉上有黃氣吾君漸欲收英髦立談左右俱動色
一語徑破千言牢我頃分符在東武脫畧萬事惟嬉遨
盡壞屏障通內外仍呼騎曹為馬曹君為使者見不問
反更對飲持雙螯酒酣箕坐語驚衆雜以嘲諷窮詩騷
世上小兒多忌諱獨能容我真賢豪為我買田臨汶水
逝將歸去誅蓬蒿安能終老塵土下俯仰隨人如桔槔
列子湯問篇周穆王征西戎西戎獻鍬鍬之劍用之切
玉如切泥焉東方朔十洲記亦云呂氏春秋荆有欬飛

者得寶劍於江干渡中流兩蛟繞舟吹飛拔劍赴江刺蛟殺之王繫刀銘陸剗犀兕水截鯨鯢杜甫大食寶刀詩蒼水使者捫赤條晉殷浩傳桓溫曰浩有德有言何使作令僕足以儀刑百揆朝廷用違其才韓退之郾城晚飲詩城上赤雲呈勝氣眉間黃色見歸期韓退之淮西碑萬口和附并為一談牢不可破晉阮籍傳文帝輔政籍當從容言於帝曰籍曾遊東平樂其風土帝大悅即拜東平相籍乘驢到郡壞府舍屏障內外相望法令清簡旬日而還馬曹王子猷事對飲用曹參吏舍歌呼意持螯用畢卓語竝見前註漢書張耳傳高祖箕踞罵詈註箕踞者謂曲兩腳其形如箕莊子天運篇子獨不見夫桔槔者乎引之則俯舍之則仰

春菜

蔓菁宿根已生葉韭牙戴土拳如蕨爛蒸香薺白魚肥

碎點青蒿涼餅滑宿酒初消春睡起細履幽畦掇芳辣
茵陳甘菊不負渠鱸縷堆槃纖手抹北方苦寒今未已
雪底波稜如鐵甲豈如吾蜀富冬蔬霜葉露芽寒更茁
久拋松葛猶細事苦筍江豚那忍說明年投劾徑須歸
莫待茵搖并髮脫

禮坊記註葑蔓菁也陳宋之間謂之葑劉夢得嘉話錄
諸葛亮所止令軍士獨種蔓菁三蜀之人今呼為諸葛
菜南史周顒傳文惠太子問顒菜食何味最勝顒曰春
初蚕韭秋末晚菘李白詩不知舊行徑初拳幾枝蕨杜
牧晚晴賦雨晴秋容新沐兮折遠園而細履劉禹錫嘉
話菜之波稜者本西竺國僧自波稜國將其子來如苜

荷因張騫而至也韓退之祭十二郎文吾年未四十而
視茫茫而髮蒼蒼而齒牙動搖又齒落詩餘在皆動搖
盡落應

始止

送鄭戶曹

鄭戶曹名
瑾彭城人

遊遍錢塘湖上山歸來文字帶芳鮮羸僮瘦馬從吾飲
陋巷何人似子賢公業有田常乏食廣文好客竟無羶
東歸不趁花時節開盡春風誰與妍

後漢鄭太字公業結交賢豪家富於財有田四百頃而
食常不足唐鄭虔傳玄宗置廣文館以虔為博士故號
鄭廣文在官貧約杜甫戲簡以
詩曰才名四十年坐客寒無羶

虔州八境圖八首并引

南康八境圖者太守孔君之所作也君既作石城
即其城上樓觀臺榭之所見而作是圖也東望七
閩南望五嶺覽羣山之參差俯章貢之奔流雲煙
出沒草木蕃麗邑屋相望雞犬之聲相聞觀此圖
也可以茫然而思粲然而笑慨然而歎矣蘇子曰
此南康之一境也何從而八乎所自觀之者異也
且子不見夫日乎其旦如槃其中如珠其夕如破

壁此豈三日也哉苟知夫境之為八也則凡寒暑
朝夕雨暘晦明之異坐作行立哀樂喜怒之接於
吾目而感於吾心者有不可勝數者矣豈特八乎
如知夫八之出乎一也則夫四海之外詎詭譎怪
禹貢之所書鄒衍之所談相如之所賦雖至千萬
未有一者也後之君子必將有感於斯焉乃作
詩八章題之圖上

坐看奔湍

一作灘

遠石樓使君高會百無憂三犀竊鄙秦

太守八詠聊同沈隱侯

華陽國志秦孝文王時李冰為蜀守作石犀牛以厭水
精穿石犀谿於江南岸杜子美石犀行君不見秦時蜀
太守刻石立作三犀牛婺州圖經八詠樓在州南
碑宋沈約文南史沈約謚曰隱集中有東陽八詠

濤頭寂寞打城還童貢臺前暮靄寒勸客登臨無限思

孤雲落日是長安

劉禹錫詩山圍故國周遭在潮打空城寂寞回南康記
贛縣東南山有臺方數丈有自然霞如屋形章貢臺乃
章貢二水合流處李太白詩
長空去鳥沒落日孤雲還

白鵲樓前翠作堆縈雲嶺路若為開故人應在千山外

不寄梅花遠信來

朱樓深處日微明
早蓋歸時酒半醒
薄暮樵漁人去盡

碧谿青嶂遠螺亭

寰宇記昔有貧女暮宿亭採螺見衆螺張口嘬其肉貧女死因葬水旁其冢化為巨石號曰螺亭石山在贛縣東南二十里

使君那暇日參禪
一望叢林一悵然
成佛莫教靈運後
著鞭從使祖生先

大莊嚴論如是衆生者乃勝智叢林一切諸善行運集在其中南史謝靈運傳會稽太守孟顗事佛精懇而為

靈運所輕嘗謂顓曰得道應須慧業丈人生天當在靈運前成佛必在靈運後晉劉琨傳與祖逖為友聞逖被用與親故書曰吾枕戈待旦嘗恐祖生先吾著鞭

卻從塵外望塵中無限樓臺煙雨濛山水照人迷向背只尋孤塔認西東

杜牧之江南春詞南朝四百八十寺多少樓臺煙雨中詩幽風零雨其濛唐皇甫冉詩山川迷向背風霧失旌旗

煙雲縹緲鬱孤臺積翠浮空雨半開想見之罍觀海市絳宮明滅是蓬萊

漢郊祀志八神五曰陽主祠之果山史記天官書海傍蜃氣象樓臺廣野氣成宮闕之杳在登州海中時時有雲氣如宮室臺觀城堞人物車馬冠蓋歷歷可見謂之海市

回峰亂嶂鬱參差雲外高人世得知誰向空山弄明月

山中木客解吟詩

徐鉉帖鄱陽山中有木客自言秦時造阿房宮者食木實遂得不死時就民間飲酒為詩一章云酒盡君莫沽壺傾我當發城市多囂塵還山弄明月顧況集亦云南康記贛縣東南山上有臺風雨之後景氣明淨頗聞山上鼓吹聲即山都木客吟唱也

讀孟郊詩二首

夜讀孟郊詩細字如牛毛寒燈照昏花佳處時一遭孤
芳擢荒穢苦語餘詩騷水清石鑿鑿湍激不受篙初如
食小魚所得不償勞又似煮彭蜺竟日嚼空螯要當闔
僧清未足當韓豪人生如朝露日夜火消膏何苦將兩
耳聽此寒蟲號不如且置之飲我玉色一作醪

杜子美述古詩秦時任商鞅法令如牛毛古樂府艷歌
行水清石自見詩國風白石鑿鑿唐書韓愈一見孟郊
為忘形交賈島亦韓門弟子島
初為浮屠名無本皆附愈傳

我憎孟郊詩復作孟郊語饑腸自鳴喚空壁轉饑鼠詩

從肺腑出出輒愁肺腑有如黃河魚出膏以自煮尚愛
銅斗歌鄙俚頗近古桃弓射鴨罷獨速短蓑一作莎舞不
憂踏船翻踏浪不踏土吳姬霜雪白赤腳浣白紵嫁與
踏浪兒不識離別苦歌君江湖曲感我長羈旅

孟東野詩銅斗飲江酒手拍銅斗歌儂是拍浪兒飲則
拜浪婆腳踏小船頭獨速舞短莎又短蓑不怕雨白鷺
相爭飛短楫畫荻蒲闌作豪橫歸笑伊水健兒浪戰求
光輝不如竹枝弓射鴨無是非又射鴨復射鴨鴨驚荻
蒲頭鴛鴦亦零落彩色難相求儂是清浪兒每踏清浪
遊笑伊鄉貢郎踏土稱風流如何卅角翁至死不裹頭
李白通塘曲浦邊清水明素足別有浣紗吳女郎又越
女詞耶谿女如雪屐上足如霜東野詩數年伊洛同一

旦江湖平江湖有
故莊小女啼啞啞

訪張山人得山中字二首

魚龍隨水落猿鶴喜君還舊隱邱墟外新堂紫翠間野

麋馴杖屨

一作履

幽桂出榛菅灑掃門前路山公亦愛山

公自註張故居為大水所壞新卜此室故居之東

韓退之詩豈念幽桂遺榛菅王注山公山簡也公自謂

萬木鏢雲龍

公自注山名

天留與戴公路迷山向背人在漢

西東薺麥餘春雪櫻桃落晚風入城都不記歸路醉眠

中

南史戴顓常憩京口黃鵠山竹林精舍郡邑志潤州有戴公山註詳八卷同柳子玉遊鶴林招隱詩杜子美夔州絕句滾東滾西一萬家江南江北春冬花

送孔郎中赴陝郊

孔郎中宗翰已見十一卷荆林馬上見寄詩註此詩疑其

自密移陝過徐州與先生會也

驚風擊面黃沙走西出峭函脫塵垢使君来自古徐州
聲震河潼殷闕右十里長亭聞鼓角一川秀色明花柳
北臨飛檻卷黃流南望青山如峴首東風吹開錦繡谷

淶水翻動蒲萄酒
詒庭生草數開樽
過客如雲牢閉口

漢衛青傳大風起砂礫擊面賈誼過秦論秦孝公據崤函之固崤謂二穀函謂函谷關王注古有南徐北徐南徐潤州北徐彭城時自彭城而往故云古徐潼關在華州華陰縣河水自龍門南流激華山而東故名河潼庾信哀江南賦十里五里長亭短亭樂府解題橫吹曲有鼓角唐樂令諸道行軍給鼓角三萬人以上角十四具鼓二十四面襄沔記峴山在襄陽下臨漢王注陝州去郡二十里有山亦名峴以其狀類峴首故得名

與梁左藏會飲傅國博家

將軍破賊自草檄
論詩說劍俱第一
彭城老守本虛名
識字劣能欺項籍
風流別駕貴公子
欲把笙歌暖鋒鏑

紅旆朝開猛士噪翠帷暮卷佳人出東堂醉卧呼不起
嘯鳥落花春寂寂試教長笛傍耳根一聲吹裂堦前石
晉樂廣傳天下言風流者王樂為稱首庾亮與郭游書
別駕任居刺史之半嵇康傳潁川鍾會貴公子也裂石
用李暮事已見八卷同柳
子玉遊鶴林招隱詩註

寒食日答李公擇三絕次韻

從來蘇李得名雙只恐全齊笑陋邦詩似懸河供不辦
故欺張籍隴頭龍

王注前漢蘄武李陵能詩謂之蘇李唐蘇味道李嶠俱
以文章顯時亦號蘇李又蘇頲李乂對掌文誥明皇謂

頤曰前此李嶠蘓味道文擅當時號蘇李今有卿及人何媿前人哉世說郭子玄語議如懸河瀉水注而不竭唐王勃傳張說評楊炯曰文如懸河之不竭韓退之贈張十八詩君乃崑崙渠籍乃隴頭瀧

簿書鑿鼓不知春佳句相呼賴故人寒日德公方上冢

歸來誰主復誰賓

周禮鼓人以鑿鼓鼓
役事德公注屢見

巡城已困塵埃眯執扑仍遭蟻蝨緣欲脫布衫携素手

試開病眼點黃連

公自注來詩謂
僕布衫督役

周禮司空執扑左傳襄十七年宋平公築臺子罕執扑以行築者而扶其不勉者漢嚴安傳介冑生蟻蝨

約公擇飲是日大風

先生生長匡廬山山中讀書三十年舊聞飲水師顏淵
不知治劇乃所便偷兒夜探赤白丸奮髯忽逢朱子元
半年羣盜誅七百誰信家書藏九千春風無事秋月閑
紅粧執樂豪且妍紫衫玉帶兩部全琵琶一抹四十絃
客來留飲不計錢齊人愛公如子產兒啼卧路呼不還
我慙山郡空留連牙兵部吏笑我寒邀公飲酒公無難
約束官奴買花鈿薰衣理鬢夜不眠曉來顛風塵暗天

我思其由豈坐慳作詩媿謝公笑謹歸來瑟縮愈不安
要當啖公八百里豪氣一洗儒生酸

公作李氏山房記云李公擇少時讀書於廬山五老峯
下白石菴之僧舍公擇既去而山中之人指其居為李
氏山房藏書凡九千餘卷漢尹賞傳薛宣舉賞能治劇
又長安中閭里少年羣輩殺吏受賕報仇相與探丸為
彈得赤丸者斫武吏得黑者斫文吏白者主治喪漢朱
博字子元遷瑯邪太守奮髯抵几斥罷病吏詳已見前
潘若冲郡閭雅談高從晦好彈胡琴天成中王仁裕使
荆渚從晦出十妓彈胡琴仁裕有詩曰紅粧齊抱紫檀
槽一抹朱絃四十條史記循吏傳子產治鄭死丁壯號
哭老人兒啼後漢侯霸傳為臨淮尹政理有能名更始
元年遣使徵霸百姓老弱相携號哭遮使者或當道而
卧曰願乞侯君復留暮年杜子美偏仄行曉來急雨春

風顛俗諺有慳值風嗇值雨之說韓退之詩瑟縮久不安晉王濟傳王愷以帝舅奢豪有牛名八百里駁常瑩其蹄角濟請以錢十萬與牛對射而賭之一發破的因據胡牀叱左右速探牛心來須臾而至一割便去三國志陳元龍湖海之士豪氣不除詳見前卷次韻荅邦直詩註

坐上賦戴花得天字

清明初過酒闌珊折得奇葩晚更妍
春色豈關吾輩事老狂聊作坐中先
醉吟不耐歌紗帽起舞從教落酒船
結習漸消留不住卻須還與散花天

唐白居易傳自號醉吟先生杜子美李尚書聯句數語歌紗帽高文擲綵牋維摩經維摩詰室有一天女見諸

天人說法即以天花散諸菩薩大弟子上花至菩薩即皆墮地至大弟子便著不墮天女曰結習未盡花著身矣結習盡者花不著也

夜飲次韻畢推官

簿書叢裏過春風酒聖時時且復中紅燭照庭嘶騾裏黃雞催曉唱玲瓏老來漸減金釵興醉後空驚玉筍工

公自注畢善篆

月上時應蚤散免教壑谷問吾公

酒聖用徐邈事詳五卷贈孫莘老七絕詩註漢書音義騾裏神馬也赤喙黑身杜子美詩願隨金騾裏走置錦屠蘇黃雞用白樂天玲瓏歌詳六卷與臨安令宗人同年劇飲詩註唐舒元與玉筍篆志秦丞相斯變蒼頡籀

文為玉筋篆體尚太古左傳襄三十年鄭伯有嗜酒為
窟室而夜飲朝至未已朝者曰公為在其人曰吾公在
壑谷又互見前

施註蘇詩卷十三